

DISSERTATIO  
CRITICO - SCRIPTURISTICA

DE

MAGIA

DIABOLICA,

ET

MAGORUM

PRODIGIIS

Exod. 7. coram Pharaone patratis.

UNA CUM

CONCLUSIONIBUS

EX

UTROQUE TESTAMENTO DESUMPTIS,

QUAS

PRÆSIDE

P. ALEXIO M. PLANCH ORD. SERVORUM B. V. M.

S. SCRIPTURÆ LECTORE ORDINARIO, & A. R. S.

IN


*Archiducali Conventu ad S. Josephum Oeniponti*

*defendendas susceper*

P. P. CHRYSOSTOMUS M. ENNEMOSER, ET JOAN. EVANG.

M. PÜCHLER ejusdem Ordinis & Studii.

*Anno MDCLXVII. Mense Februario.*



PERMISSU SUPERIORUM.

Litteris Wagnerianis.

~~7490-575~~

BK  
A. 709.2.

Sirenum Cantus, & Circes pocula nosti.

*Horat. lib. I. epist. ad Lollium.*



S U B  
GRATIOSISSIMIS AUSPICIIS  
*CELSISSIMI AC REVERENDISSIMI*  
DOMINI DOMINI  
**CHRISTOPHORI**  
**EPISCOPI**  
A C  
S. R. I. PRINCIPIS  
TRIDENTINI,  
MARCHIONIS  
CASTELLARII,  
DOMINI DOMINI CLEMENTISSIMI &c. &c.

CELSISSIME  
PRINCEPS,  
DOMINE DOMINE  
EPISCOPE  
CLEMENTISSIME &c. &c.



Vix quatuor abhinc anni effluxere, cum  
AUGUSTISSIMA IMPERATRIX  
NOSTRA MARIA THERESIA di-  
vino magis, quam humano consilio Scripturam  
sacram non in publicis solum sublimiorum scien-  
tiarum emporiis, sed in privatis quoque Reli-  
giosorum Domiciliis prælegi imperabat. Supe-  
riores mei (pro ea, quæ TANTÆ PRINCIPI  
debetur reverentia) nihil habuere antiquius,  
quam ut Augustissimis Imperiis obtemperarent.  
Sed, quæso, quæ mea extitit admiratio, cum  
sacra

sacra Superiorum iussa me altissimæ huic cathedrae admotum cupiebant! gaudebam equidem ex una parte, quod fors ista super me ceciderit (a); dolebam autem vehementissime ex parte altera, eoquod propria nossem experientia me nimium quantum distare ab illo, qui teste Apostolo jam ab infantia sacras litteras didicit (b). Putabam insonare auribus meis illas Philippi Diaconi Eunuchum Reginae Candacis alloquentis voces (c): *Putasne, intelligis, quæ legis?* videbar mihi cum eodem Eunucho respondere: *Quomodo possum, si non aliquis ostenderit mihi* (d)? Exclamare cogebar cum Augustino ad Januarium (e): *Tantum absum ab eo, quod putasti, nihil me latere, ut nihil in Epistola tua legerim tristius, quia & apertissime falsum est. Et miror, quia hoc te latet, quod non solum in aliis innumerabilibus rebus multa me latent, sed etiam in ipsis sanctis scripturis*

) ( 3

pturis

(a) Act. 1. v. 26.

(b) 2. Tim. 3. v. 15.

(c) Act. 8. v. 30.

(d) Act. 8. v. 31.

(e) Epist. 119. ad Januar.



*pturis multo nesciam plura, quam sciam. His tamen  
insuper habitis duce obedientia, quantum pote-  
ram, laborabam, & inter millenas denique dif-  
ficultates primum hunc sacrae Scripturae cursum  
ad optatum finem perduxì, quamvis vel invi-  
tus fateri compellar, me de illorum numero  
esse, qui teste Hieronymo (f): *Ad sensum suum  
incongrua aptant testimonia, quasi grande sit, & non  
vitiosissimum docendi genus depravare sententias, &  
ad voluntatem suam Scripturam trahere repugnantem.**

In tanta rerum caligine, in tanta intelle-  
ctus cæcitate versatus sæpius cum Propheta Re-  
gio suspirabam (g): *Faciem tuam illumina super ser-  
vum tuum.* Et en! vel ad solam REVEREN-  
DISSIMI NOMINIS TUI memoriam tenebræ  
omnes *tanquam squamæ ab oculis cecidere* (h). Nec  
mirum: Te enim CELSISSIME PRINCEPS  
*Spiritus Sanctus illam regere Ecclesiam posuit* (i),  
quæ

---

(f) Tom. 3. in epist. ad Paulin.

(h) Act. 9. v. 18.

(g) Psalm. 118.

(i) Act. 20. v. 28.

quæ duobus abhinc sæculis contra Novatores  
detonuit, sacras litteras a Sectariis male intel-  
lectas explicuit, corruptas pristino nitori re-  
stituit. Unde *formam habes sanorum verborum, quæ  
audisti in fide, & bonum custodis depositum per Spi-  
ritum sanctum* (k).

Patere igitur, CELSISSIME PRIN-  
CEPS, ut meas sacrarum litterarum Primitias  
CELSISSIMO TUO NOMINI inscribam,  
& patieris etiam (l), *sectaris enim justitiam, pieta-  
tem, fidem, charitatem, patientiam, mansuetudinem,*  
quarum Virtutum seriem elapso abhinc anno in  
Te uno omnes suspeximus, cum in nostro mo-  
nasterio diebus paucis (utinam annis plurimis)  
habitare dignabaris. Hic certe Majestatem di-  
gnam Principe cum tanta modestia tempera-  
bas, ut vel solus Tui intuitus omnes ad reve-  
rentiam cogeret, suavissima autem conversatio  
Tua humilitate plenissima singulos necessaria  
qua-

---

(k) 2. Tim. I. v. 13. & 14. (l) 1. Tim. 6. v. 11.



quadam vi ad amorem pelliceret (*m*): nempe *pascis, qui in Te est gregem Dei non ut Dominans in Clero, sed forma factus gregis ex animo.* Felices sane Oviculas, quæ a tanto Pastore ducuntur ad pascua, fortunatum Conventum Weissensteinensem, pro cuius salute vigilat tantus Pastor inter curas amore plenissimas. Parco modestiæ Tuæ, quam non verbis tantum & factis, sed scriptis etiam demonstraſti. O si ad omnium manus illa perveniret Epistola, quam ad me fervorum Tuorum minimum exarare dignatus es! Nimia humilitas Tua, quæ e singulis ejusdem lineis eluceſcit, audaciorem & prope temerarium me effecit.

Accedo igitur (id enim concessit Benignitas Tua) accedo ad thronum CELSITUDINIS TUÆ, & in genua provolutus tenue Opusculum offero, tenue & foliorum paucitate,

&

---

(*m*) 1. Pet. 5. v. 2. & 3.



& scribentis eruditione, & materiæ indignitate. Non equidem me latet plurimas in scripturis esse materias, quæ eruditum sibi calamum possint; sed cum ea modo vivamus tempora, in quibus insurgunt (n) homines, qui sanam doctrinam non sustinent, sed ad sua desideria coacervant sibi magistros prurientes auribus, & a veritate auditum avertunt, sic illam potissimum materiam eligere statui, quæ modernorum Crisi omnium maxime subiacet. Prodigia quidem Magorum (o) coram Pharaone patrata maxima SS. PP. ingenia quam diutissime vexabant, ut vero mea de illis sententia magis claresceret, primam de Magia diabolica Dissertationis partem præmittendam esse censebam, de qua sane nonnulli liberius, quam verius sentire videntur. Prodeat igitur hoc opusculum sub GRATIOSISSIMIS TUIS AUSPICIIS, PRINCEPS CELSISIME, & dum Episcopali e throno veritatis defensor es,

) (

etiam


---

(n) 2. Tim. 4. v. 3. & 4.

(o) Exod. 7.

etiam opusculi mei tutelam Clementissime suscipe, & me unacum Superioribus meis ac Conventu Weissensteinensi, cujus CLEMENTISSIMUS ES ORDINARIUS, & præcipuus Imaginis Thaumaturgæ Cultor, uti & Defendentibus tanquam servos Tuos devotissimos protegere non dedignare, qui coram throno Tuo de genu supplices perennant semper Tui

Præses  
&  
Defendentes.



*Approbatio A. R. P. Vicarii Generalis.*

**U**t erudita hæc *de Magia diabolica, & Magorum Prodigiiis coram Pharaone patratis* Dissertatio a duobus Ordinis nostri Theologis revisa, & approbata typis evulgari possit, eam, quam ex Officio possum, facultatem concedo in Conventu nostro ad S. Josephum Oeniponti die 6ta Februarii anno 1767.

P. F. ZACHARIAS MARIA  
RATHGEB Ord. Servorum  
B. M. V. SS. Theol. Lector,  
& Concion. Definit. perpet.  
ac p. t. per Prov. Tyrolens.  
Vicarius Generalis mppria.

PROE-



## PROEMIUM.

\*\*\*\*\*  
\* N \*  
\* \*  
\* \*  
\*\*\*\*\*  
Non cogitabam equidem, utpote gravioribus studiis occupatus Dissertationem quandam juris publici facere, nam labores scripturistici, ut cuivis intelligenti conjicere pronum est, horas etiam subcisivas mihi quamvis invito eripuerunt. Nolebam tamen ex parte altera Cursum hunc in Scripturis explicandis exantlatum indigno quasi silentio præterire. Cogitabam primum hoc inter nostros ex universa Scriptura certamen esse, quod ne tenui quidem lucubrationum exornare minime conveniret. Cum igitur mecum ipso diutius deliberarem, nec quid agendum esset, sufficienter decernerem, Magorum mihi incidebant prodigia Exod. 7. coram Pharaone patrata. Et ecce! alliciebat illico & materię dignitas, & eruditionis ubertas, & denique differendi amœnitas. Antequam tamen ad scopum hunc pervenire me posse crederem, omnino necessarium duxi de Magia diabolica quædam præmittere. Duos enim inter scopulos me versari conspicio: sunt siquidem ipso Calmeto teste (\*) Authores, qui rejiciunt omnia, sunt pariter, qui omnia credunt; unde & istorum credulitas, & nimia aliorum laxitas Viro prudenti vitanda est. Ut autem securiori pede incederem, in duas partes Dissertationem hanc dispescere placuit. Prima Recentiorum quorundam omnes Magiæ diaboliciæ vires negantium systema proponet cum omnibus iis, quæ contra id facere posse cognovi. Objectum alterius Magorum erunt prodigia coram Pharaone patrata. Tu Lector benevole laborem hunc meum æqui, bonique consule, & errores meos dissimula, nam emendaturus, si licuisset, eram.

## PARS


---

(\*) Tom. I. Dissert. de veris, fictisque Prodigiis.



# PARS PRIMA.

De Systemate quorundam Recentiorum de inefficacia Magiæ diabolicæ , & Momentis illi contrariis.



## ARTICULUS I.

*Recensetur Sententia Recentiorum de Invaliditate Magiæ diabolicæ.*



U t debito rerum ordine procedamus , non diffitentur eruditissimi Viri existere homines , qui derelicto Deo dæmonis castra sequuntur, ejusque auxilio mira quædam patrare conantur, omnem tamen ipsorum conatum duntaxat sterilem, & optato fructu carentem existimant. Sicut enim quidam se somniorum interpretes esse, & ex avium volatu, vel syderum motu arcana quædam divinare se posse jactabant,

A

quia



## 2 P. I. Art. I. Recensetur Sententia Recentiorum

quin tamen ipsorum verbis quidquam veritatis inhæserit, ita pariter de Magorum operibus discurrendum esse pronuntiant.

Est autem Magia vel expressum vel tacitum cum Dæmone Pactum, vi cuius ipsi transcribitur anima iis tamen conditionibus, ut saga certis diebus, horisque omni voluptatum genere perfundatur, & ab ipso Diabolo in hirci, vel alterius animantis specie ad constitutum ab ipso locum transferatur, ibique in aliorum huius furfuris hominum societate nefanda libidine diffuat, ut in detrimentum Provinciæ, vel civium excitare tempestates, & grandines, evocare e cœlo fulmina, fulguraque possit, ut infantes fascinare, aliorum pecora infirmare, quin etiam in innocentum corpora integras dæmonum legiones possit intrudere.

Incipiamus jam ponderare hæc omnia: in primis Pactum cum dæmone nullum est, ridiculumque. Vel enim (arguunt eruditi Authores) ad solam invocationem sagæ sponte libera se sistit diabolus? vel saga ipsa per operationes magicas dæmonem ad præsentiam cogit? Nec primum, nec secundum ad rectæ rationis apicem dicitur. Certe secundum quod attinet, apud omnes Philosophos certum est, quod inter magica verba, circulos, aliaque signa corporea, & inter diabolum, qui merus est spiritus sit nulla proportio, quomodo ergo cogi possit ab homine, ut ad ipsius nutum compareat? ut taceam de tam superbo spiritu existimari haud posse, quod vetulæ alicujus imperio subditus illico & cæca quasi obedientia ductus appareat.

Sed nec primum subsistit: dæmon siquidem damnatus & reprobatus est spiritus, visibili cum hominibus consortio caret, nec in ipsius est potestate pro libitu corpus assumere, & in assumpto sic corpore sociari hominibus, hæc enim potentia (si Patribus fides) ipsi jam dudum ademta est. *Cum apparuerit Dei Verbum* (verba sunt Athanasii) *spectra hujusmodi, & ludibria imaginum cessavere* (a). Imo si esset in libertate dæmonis positum ad invocationem sagæ illico corpus assumere, & sub visibili specie cum saga versari, quæso, quis nostrum & hominum, & dæmonum declinare posset insidias? præsertim cum maledictus hic spiritus nil desideret amplius, quam

---

(a) De incarnat. Verb.



quam nocere hominibus. Certe aliter modo sentit Europa (pau-  
cas ad Septentrionem Provincias velim excipias) melius de veri-  
tate edocta. Hæc enim visibilem ejusmodi conversationem dæmo-  
nis ridet, imo ipsa Magorum experientia risibilem probat: infeli-  
ces enim hi homines vel inviti fatentur, se invocato dæmonis per-  
sæpe auxilio semper ab ipso fuisse desertos.

Nec subsistit tacitum Pactum cum dæmone, vi cujus sine  
visibili illius præsentia per usum hujus vel alterius rei mira patren-  
tur. Vel enim res istæ ex natura sua vim habent, & efficaciam  
ad destinatos effectus? & nemo prodigium ope dæmonis dixerit,  
vel non habent ejusmodi vires? & tunc sine vero miraculo similia  
fieri non possunt. Solius enim Omnipotentis est naturas rerum in-  
vertere, & consuetum naturæ cursum mutare.

Responsionem oppositæ sententiæ, quod permittente Deo  
id fiat, Manichæismi accusant. Duplici ad id asserendum funda-  
mento moventur, quorum primum sana ratio, alterum sacre scri-  
pturæ, & traditionis autoritas abunde suppeditat: vel enim divi-  
nis perfectionibus, ac præcipue bonitati repugnat, ut Deus pravis  
desideriis sagæ, & turpibus voluptatibus moveatur, ut reprobo  
spiritui concedat potentiam creaturis dominandi divina solum pote-  
state productis, iisque abutendi pro libitu, idque ad voluntatem  
pessimi hominis, vel omnino dicendum est, quod & Manichæi di-  
xere: nempe duos dari Deos, unum bonum, alterum malum. Scri-  
ptura vero, Patresque unanimiter docent per Salvatoris adventum  
diabolo jam infirmo & in inferis captivo spiritui omnem similem  
potestatem fuisse ademptam.

Pergunt dein specialia sagarum opera examinare, earumque  
physicas translationes per dæmonem, ac imprimis unguentum, quo  
solent ungere corpora, ut ad destinata loca ferantur, irrident,  
ajuntque omnes species ad id requisitas conciliando tantum somno  
esse idoneas, unde perturbata phantasia vetulæ firmissime credunt  
se alio fuisse translatas, ubi tamen eodem morabantur in loco. Ad  
historias dein varias a Viris fide dignis relatas appellant, e quibus  
elucet mulieres ejusmodi vel in lectis, vel ad fenestras inventas  
fuisse.

#### 4 P. I. Art. I. Recensetur Sententia Recentiorum

Urgent conclusionem suam ex jure Canonico citantes c. 26, quæst. 5, c. 12 his verbis: *Illud etiam non est omittendum, quod quædam sceleratæ mulieres retro post Sathanam conversæ dæmonum illusionibus & phantasmatibus seductæ credunt, & profitentur se nocturnis horis cum Diana Dea paganorum vel cum Herodiade & innumera multitudine mulierum equitare super quasdam bestias, & multarum terrarum spatia in tempestæ noctis silentio pertransire, ejusque jussionibus velut dominæ obedire, & certis noctibus ad ejus servitium evocari, sed utinam hæc solæ in perfidia periissent, & non multos secum ad infidelitatis interitum pertraxissent, nam innumera multitudo hac falsa opinione decepta hæc vera esse credunt, & credendo a recta fide deviant, & errore paganorum involvuntur, cum aliquid divinitatis aut Numinis extra unum Deum arbitrantur. Quapropter Sacerdotes per Ecclesias sibi commissas populo Dei omni instantia prædicare debent, ut noverint hæc omnino falsa esse, & non a divino, sed a maligno spiritu talia phantasmata mentibus fidelium irrogari.*

A Jure Canonico ad Philosophiam festinant, & ex legibus gravitatis ostendunt sagas non tantum non transferri a dæmone, sed transferri nec posse. Ad minus enim ducenties humani corporis gravitas aeris gravitatem transcendit, unde necessario sequitur, dæmonem vel humano corpori debere gravitatem adimere, vel gravitatem aeris secundum proportionem augere, neutrum sine manifesto fieri potest miraculo.

Postea ad fulmina transeunt, & grandines ad ventos, & pluvias, quæ sagarum ope pronuntiatis tantummodo non sine murmure verbis iisque non fat intelligibilibus ad contactum etiam lutei vasis produci dicuntur. Pro! miseram (exclamant) & cogitationem homine Christiano indignam! ergo Deum leges naturæ credamus infringere, ut pessima mulier vindictam exercere in proximum, ejusque agros, & fructus agrorum possit demetere? ergo recta ratione seposita naturam, ejusque authorem inveteratæ mulieris malitiæ cupimus esse subjectum? nonne hæc infinitæ bonitati divinæ, nonne inexhaustæ sapientiæ Dei manifeste repugnant?

Ecclesia ipsa infelix hoc operatricis Magiæ systema evertit, quamvis enim ad quoslibet casus certas destinaverit preces in ritualibus vel liturgiis expressas, nullas tamen contra sagarum opera  
statu-



statutas inveniunt, & licet pro avertendis fulminibus & tempestatibus aeris fundatur oratio, nulla tamen deprehenditur mentio, quod similes casus a sagarum potestate proveniant, & quidem meritisimo jure, siquidem omnibus constat & singulis hasce tempestates & fulmina opus esse naturæ, nihilque aliud esse, quam vapores terræ per solem attractos, qui dein in aere ad grandines & pluvias & tonitrua præparantur.

Uterius simplicitatem infimæ gentis exagitant, quæ plerosque casus sagarum importunitati adscribit: si quis fortasse infans elumbis est, si rusticus manibus, pedibusque contractus, si famulus rectæ rationis usu privatus, sagarum id opus est. Si pecus infirmum est, si macilentia ingruit, si vaccæ lactis loco sanguinem præbent, verbo, si quodcunque demum corpus morbo laborat, quem vel Medicus, vel faber ferrarius, vel carnifex sanare non potest, diabolicæ arti adscribitur, sed frustra.

Quid enim, quæso, facilius, quam ut ancilla incauta infantem labi sinat e manibus, & ne verba heri aspera experiatur vel verbera, lapsum infantis reticeat? quo fit, ut infans fiat elumbis, & membra, sic ab initio statim neglecta omnino arescant. Idem potest dici de pecore, id enim constitutum in pascuis venenatum quid comedit, lac evanescit, vel mutatur in sanguinem, infirmatur, moritur, quis propterea sagas accuset?

Censent eruditi Authores, si tot sagarum non narrarentur historiæ, si non in quovis extraordinario casu Sacerdotum benedictiones accederent, si sagarum fumus negligeretur, nec amuleta appenderentur in vanum, brevi negligendam fore diabolicam artem, nec sagarum ministerio adscriptum iri hos casus. Certe si spiritualia pellendis his morbis conducere, sollicita Mater Ecclesia de his mediis providisset, ubi e diametro experimur contrarium, ubi orationes similes, & amuleta ex circulo aureo aliisque depromta Authoribus ab Ecclesia esse rejecta & reprobata cognoscimus.

Si quis subinde casum contingere asserat, quem Viri etiam prudentissimi naturæ negant posse adscribi, ajunt hos præjudiciis esu obsessos, & certe suam mutatueros sententiam, si modernorum opera legerent.

Tandem ajunt, impossibile esse, ut eousque fagarum se extendat potentia, ut malignos spiritus in proximi corpus possint intrudere, quamvis enim & veteris & novi testamenti paginae energumenorum historiis plenae sint, nullibi tamen asseritur fagarum ope immisos esse diabolos, imo id fidem omnem transcendere. Vel enim saga ex speciali permissione divina id faceret? & id vel cogitare blasphemum est, cum Deus ad magicas artes cooperator existeret, vel Deus ad voluntatem impiam sagæ reprobo concedit spiritui, ut in humano corpore habitet? & sic permissiones divinae pravis fagarum cupiditatibus essent subjectæ, quod dictu horrendum est.

Ex Bodino lib. 2, c. 3 historiam afferunt, quod sub Paulo 4to Pontifice ingens energumenorum numerus Romæ extiterit; exorcista facile credulus referebat Pontifici ex obsessis dæmones respondisse corporibus se a Judæis in hæc corpora fuisse intrusos. Indignatus Pontifex Judæos omnes urbe ejectos voluit, sed postquam Religiosus quisquam eleganti sermone ostenderat rectæ rationi esse contrarium, ut homo quispiam diabolum in corpus alterius possit intrudere, mutata sententia est, unde Muratorius: Mirabile est, inquit, quod in iis Provinciis, ubi exorcistæ non sunt, nec energumeni sint. Hoc (ni vehementer fallar) modernorum systema est, ad quod fufius examinandum accingor.

## ARTICULUS II.

### *Quid, & quotuplex sit Magia?*

**U**t autem suo res ordine possit procedere, sciendum inprimis est, Magiam nil aliud esse, quam artem, vi cujus mira patrantur: *Mira* autem dico, non vero *Miracula*: Miraculum siquidem totius naturæ vires transcendit, nec fieri potest nisi ab illo, qui naturæ leges a se sancitas in casu particulari infringere, & pro suæ Omnipotentiae viribus agere potest. Non ergo illa censenda sunt esse miracula, quæ homines passim mirantur, sic enim omnia essent miraculis plena, præsertim ubi moderna Philosophia iis experimentis instructa est, quæ homines non solum rudes, sed etiam doctos



doctos obstupefcere faciunt. Certe pnevmatica Antlia, electrica machina, virtus magneticâ sunt legibus naturæ conformia; vix tamen ullus exiftet, qui fpectando curiofos effectus illos mirari non foleat. Hi vero a Magia naturali procedunt non tantum nequam illicita, fed & fumme laudabili; quæ vero dæmonis ope patrantur invocato illius auxilio, a diabolica Magia descendunt, quam omnia jura condemnant, imo vero ferro plectunt, & igne. Non eft, quod in varias Magiæ diabolicæ fpecies curiofus inquiram, hæ fiquidem in quovis Theologo de Religionis virtute tractante, imo & per Differtationis decurfum fufficienter clarescent.

A Magia igitur & Magi dicuntur. Eft autem *Magus* vox juxta quosdam hebraica, juxta alios Perfica, nec in ethymologia nominis quidquam mali involvit. Vel *meditans* enim, vel *filens* vertitur, utrumque autem Philofophorum eft. Meditantur fiquidem, quando in rerum naturalium ordinem, præcipue in admirabilem fyderum curfum inquirunt. Silent vero, ut eo attentius fpeculari, & fcientiis naturalibus poffint incumbere. Si igitur ad latinam linguam velimus attendere, *Magus* idem erit ac *Sapiens* apud Romanos, apud Græcos *Philofophus*, *Scriba* apud Judæos, *Propheta* apud Ægyptios, *Druida* apud Gallos, *Chaldæus* apud Affyrios, apud Indos *Gymnofophifta*. Modernis vero temporibus plerumque obtinuit, ut Magorum nomen in finiftram tantummodo partem accipi foleat.

Si Magiæ diabolicæ antiquitatem indagare velimus, ne folidis quidem conjecturis aflequi poffumus. Caffianus illius cunas jam ante-diluvianas exiftimat (b), cum enim pofteri Seth, qui ob pietatem paternam & propriam filii Dei dicebantur, a primævo fervore defciferent, ac filiarum Cain fpeciofa forma decepti cum illis inirent connubia, ad magicas artes & maleficia dæmone infligante converfi funt. Poft diluvium ortam effe Magiam alii conantur defendere, imo e maledictis his artibus idololatriam promanaffe contendunt, inter quos eft Magnus Bafilius in Prophetam Ifaiam (c) commentans. Epiphanius autem Magiæ Authorem Zoroaftrem exifti-

---

(b) Bibl. PP. tom. 5, p. 2, Coll. 8, c. 21.

(c) in C. 2. Ifaiæ.

existimat Nemrodo fere coævum (*d*). Sed incerta Zoroastris est ætas, imo & incerta sunt illa, quæ de Zoroastre narrantur. Alii cum Chamo Noemi filio, alii cum Abrahamo, alii omnino cum Mose confundunt, quod idem prætendit Daniel Huetius Galliæ clarissimum fydus (*e*). Sed non est, ut his diutius immoremur: ad scopum siquidem nostrum abunde jam sufficit, si Magiam diabolicam non otiosam, sed practicam fuisse, vel saltem esse sic posse probare conabimur.

### ARTICULUS III.

#### *De Sensu Poetarum gentilium de Magia diabolica.*

**N**ec est, ut e longinquo argumenta petantur, Poetarum siquidem Princeps Virgilius plura suppeditat, cum enim Æneæ in latium iter describeret, ita Circes veneficia eleganter cecinit (*f*):

Proxima Circeæ raduntur littora terræ,  
Dives inaccessos ubi solis filia lucos  
Assiduo resonat cantu, tectisque superbis  
Urit odoratam nocturna in lumina cedrum.  
Arguto tenues percurrens pectine telas.  
Hinc exaudiri gemitus, iræque leonum  
Vincla recusantum, & fera sub nocte rudentum.  
Setigerique fues, atque in præsepibus urfi  
Sævire, ac formæ magnorum ululare luporum,  
Quos hominum ex facie Dea sæva potentibus herbis  
Induerat Circe in vultus, ac terga ferarum.

\* Hæc omnia, si meras illusiones dixeris, aliud exemplum adduco: Juno siquidem Æneæ invidens ut illius iter in latium, si impedire non posset, saltem vix tolerandum redderet, ipsam ex inferis furiam Alecto advocat, cujus vires, magnamque potentiam ita Poeta noster expressit (*g*):

Hæc

(*d*) contra Hæref. fere ab initio.

(*e*) Dem. Evang. propof. 4, c. 5.

(*f*) Lib. 7. Æneid.

(*g*) Lib. 7. Æneid.



Hæc ubi dicta dedit, terras horrenda petivit  
Luctificam Alecto dirarum ab sede sororum  
Infernisque ciet tenebris, cui tristia bella  
Iræque, insidiæque, & crimina noxia cordi.  
Odit & ipse Pater Pluton, odere sorores  
Tartareæ monstrum, tot pullulat atra colubris  
Quam Juno his acuit verbis, ac talia fatur.  
Hunc mihi da proprium Virgo fata nocte laborem  
Hanc operam, ne noster honos, infractave cedat  
Fama loco, neu Connubiis ambire latinum  
Æneadæ possint, Italosque obsidere fines.  
Tu potes unanimes armare in prælia fratres  
Atque odiis versare domos, tu verbera tectis  
Funerasque inferre faces, tibi nomina mille  
Mille nocendi arces: fœcundum concute pectus,  
Disjice compositam pacem, fere crimina belli,  
Arma velit, poscatque simul, rapiatque juvenus.

Hanc virtutem, qui sterilem dixerit, enimvero decipitur.

Tertium superaddo, quod idem Virgilius suggerit ita Dido-  
nem sorori Annæ colloquentem inducens (h):

Hinc mihi Massylæ gentis monstrata Sacerdos  
Hesperidum templi custos, epulasque draconi  
Quæ dabat, & sacros servabat in arbore ramos.  
Hæc se carminibus promittit solvere mentes  
Quas velit, ast aliis duras immittere curas:  
Sistere aquam fluviis, & vertere sydera retro  
Nocturnosque ciet manes, mugire videbis  
Sub pedibus terram, & descendere montibus ornos,  
Testor, chara, Deos, & te Germane, tuumque  
Dulce caput, magicas invitam accingier artes.  
Nec, puto, Magiam hanc jure quis otiosam dixerit.

Ovidius non inferiora secutus Magiam tam in amore con-  
ciliando, quam aliis præstandis effectibus maximopere efficacem

B

agno-



agnoscit, dum Medæ veneficia ita per Hypsipilen deceptam a Jasonone describit (i):

Nec facie meritisve placet, sed carmine movit  
 Diraque cantata pabula falce metit.  
 Illa reluctantem cursu deducere lunam  
 Nititur, & tenebris abdere solis equos.  
 Illa refrænât aquas, obliquaque flumina sistit,  
 Illa loco fylvas, vivaque saxa movet.  
 Per tumulos errat passis discincta capillis  
 Certa que de tepidis colligit ossa rogis  
 Devovet absentes, simulacraque Cerea figit  
 Et miserum tenues in jecur urget acus.

Ipsa Medea etiam Jasoni scribit, se injuriam sibi illatam brevi ulturam esse, ni repudiata Creusa ipsam denuo in uxorem susciperet, verba apud eundem Ovidium ista sunt (k):

Dum ferrum, flammæque aderunt, succusque veneni  
 Hostis Medæ nullus inultus erit.

Prætereo ex eodem Poeta, quod Orpheus certissime Magus Eurydicen uxorem suam reduxisset ad vitam, ni curiositas propria obstisset (l). Tanta insuper erat Orpheanæ lyræ efficacia, ut pene omne ferarum genus, imo & arborum alliceret (m).

Novis subin sponsis maleficia posse accidere Catullus agnovit, dum ita novam nuptam alloquitur (n):

Transfer omine cum bono  
 Limen aureolos pedes  
 Rasilemque subî forem.

In quæ verba ita Constantius Landus (\*): *Verosimilius fuisse videtur Catullum hoc dixisse propter artem magicam, unde Virgilius in pharmaceutria:*

Quæ nunc ego limine in ipso  
 Terra tibi mando, debent hæc pignora Daphnin.

*Siqui-*

(i) in epist. Heroid.

(m) l. c. fab. 3.

(k) in epist. Heroid.

(n) in nuptias Juliæ & Manilii.

(l) Lib. 10. Metamorphos. fab. 2.

(\*) l. c.

*Siquidem multa maleficia videmus quotidie fieri in novis sponfis, ut etiam propter hosce incantatores novus maritus cum nova nupta coire nequeat.*

Quid possit mulier magicis artibus dedita, ita describit Propertius (o):

Illa velit, poterit magnes non ducere ferrum

Et volucris nidis esse noverca suis.

Quippe & collinas ad fossam moverit herbas,

Stantia currenti diluerentur aqua.

Audax cantatæ leges imponere lunæ,

Et sua nocturno fallere terga lupo,

Possit & intentos astu cæcare maritos,

Cornicum immeritas eruit ungue genas.

Consuluitque stryges nostro de sanguine, & in me

Hippomanes fætæ semina legit equæ.

Artibus magicis amorem conciliari posse idem Poeta persuasus erat, unde & similibus veneficarum auxilium implorare non dubitat (p).

At vos deductæ quibus est fallacia lunæ

Et labor in magicis sacra piare focis.

En! agedum dominæ mentem convertite nostræ

Et facite illa meo palleat ore magis.

Potestatem magicam vetulis potissimum Tibullus tribuit (q):

Num te carminibus, num te pallentibus herbis

Devovit tacito tempore noctis anus?

Cantus vicinis fruges traducit ab agris

Cantus & iratæ detinet anguis iter.

Fusius sagarum opera idem Tibullus describit (r):

Hanc ego de cælo ducentem sydera vidi

Fluminis hæc rapidi carmine vertit iter

Hæc cantu finditque solum, manesque sepulchris

Elicit, & tepido devocat ossa rogo.

Jam ciet infernas magico stridore catervas

Jam jubet asperfas lacte referre pedem,

B 2

Cum

(o) Lib. 4. eleg. 5.

(p) Lib. 1. eleg. 1.

(q) Lib. 1. eleg. 1.

(r) Lib. 1. eleg. 2.



Cum lubet, hæc tristi depellit nubila cœlo

Cum lubet, æstivo convocat orbe nives.

Putat ergo hic Author etiam artibus magicis excitari tempestates posse. Nec alia mens fuit Horatio, plurimam siquidem virtutem beneficiis tribuit (s):

Quæ saga, quis te solvere Theſſalis

Magus venenis, quis poterit Deus?

Ubi notes velim Theſſalos in arte magica quondam omnium maxime fuisse infames. Idem de periculo Ulyſſis in mari exantlatis ita canit:

Sirenum voces, & Circes pocula noſti,

Quæ, ſi cum fociis, ſtultus, cupidusque bibiſſet,

Sub domino meretrice fuiſſet turpis & excors,

Vixiſſet canis immundus vel amica luto ſus.

Taceo Juvenalem, Perſium, Lucretium, Claudianum, Lucanum, & alios, ut adeo nullus ſit dubio locus Poetas gentilium pro Magia vel maxime practica ſtetiſſe.

## ARTICULUS IV.

### *De Sensu aliorum Scriptorum gentilium.*

**S**i Poetarum mentem ad meras fabulas ablegare contendas, non ex toto repugno, nec enim a Poetis veritatem, ſed unanimem duntaxat illorum ſenſum haurire ſtudebam; quod tamen Poetæ non omnino a veritate abluſerint, aliorum Gentilium ſenſa ostendunt. Pomponius Mela ſcriptor ſatis antiquus ita de quibusdam in Gallia ſceminis (t), quas *Gallicenas* vocant, putantque ingeniis ſingularibus præditas maria ac ventos concitare carminibus, ſequæ, in quæ velint animalia vertere, ſanare, quæ apud alios inſanabilia ſunt. Plinius, quamvis artis magicæ uſum ſummopere deteſtetur, ſemper tamen vigiſſe affirmat (u), ita quidem, ut in magna gentium parte præ-

(s) Lib. 1. Ode. 27.

(t) de Situ orbis lib. 3.

(u) Lib. 30. c. 1.

prævaleat, & in Oriente Regum Regibus imperet. Qui magis curiosus est, authorem hunc totum evolvat, & tam herbas quam lapides magicos leget cum miris eorum effectibus, uti & veneficiorum remedia. Imo non tantum plebejos, sed & summos Reipublicæ Principes in Occidente diabolica hæc pestis afflavit. De Nerone siquidem ita Suetonius (x): *Quin & factō per Magos sacro evocare manes & exorare tentavit.* Mirabilem de annulo magico recenset historiam divinus Plato de Gyge Lydi Parente (y): *Fuisse ipsum ferunt mercenarium pastorem ejus, qui tunc Lydis imperabat. Magna autem imbrium tempestate exorta, motaque terra ferunt terram hiatum fecisse in ea regione, ubi ille armenta pascebat, quæ cum vidisset, mirabundus in hiatum descendit, conspexitque & alia, quæ fabulantur miranda, & equum æneum concavum, & per fenestram cadaver in alvo equi animadvertit majus quidem humana forma. Hoc nihil habebat aliud præter aureum digito annulum, quo sublato abiit, ac paulo post ad pastorem pervenit conventum, in quo legatus de rebus peculii ad Regem per singulos menses referendis creandus erat, juxtaque alios assedit. Acciditque, ut cum forte gemmam introrsum ad manum verteret annuli, quem a cadavere arripuerat, subito a nullo conspiceretur, aliique de illo tanquam absente loquerentur. Admiratus ergo gemmam rursus extrorsum convertit, quo factō rursus apparuit. Hoc ille animadvertens diligentius periculum fecit, utrum hanc annulus vim haberet, atque ita illi compertum fuit, quod versa ad se gemma a nemine videretur, versa autem ad alios conspicuus fieret. Quod quidem expertus curavit, ut legatus ad Regem unacum aliis mitteretur, profectusque uxorem ejus stupravit, & de Rege interficiendo cum ea consilium iniit, quo cæso regnum assumpsit. Enimvero hic annulus certe practicus erat.*

Perfuationem de maleficiis jam suo tempore extitisse idem Philosophus asserit, quamvis, quo hæc modo contingant, nescire se fateatur, & pro sua persona in partem negativam propendeat (z): *Bipertito generi humano venena officiunt: primo enim corporibus corpora secundum naturam læduntur. Deinde magicis veneficiis, & cantibus, nodisque quibusdam persuadetur iis quidem, qui officere student, posse id*

B 3

assequi,

(x) in Nerone.

(z) de Leg. Dial. 11.

(y) Dial. 2. de Repub.



*assequi, iis vero facile admodum ab illis veneficio lædi posse; hæc vero, cæteraque hujusmodi, quo pacto natura se habeant, nec facile sciri possunt, nec si quis sciat, aliis persuaderi.*

Pythagoram clarum inter Philosophos nomen Magis etiam Plutarchus annumerat ita fermocinans (a): Ille videtur & Aquilam quibusdam vocibus excantans superneque volantem deducens mansuefacere solitus, & femur aureum subostendere, dum in olympiis per celebritatem transitum faceret: aliaque monstrosa ejus inventa renuntiantur, contra quæ scripsit Timon Phliasius (b):

Pythagoramque magum flagrantem nomine famæ  
Observe, blandis affluetum fallere verbis.

Numam Pompilium alterum Romanorum Regem his artibus floruisse idem Plutarchus enarrat: ut enim taceam furtivos ejus cum Æge-ria Dea congressus mirabilia adhuc de illo refert præfatus Author (c): Cum nonnullos Cives Numa ad convivium invitasset, vasaque abjecta, & cænam admodum vilem, ac plebejam apposuisset, jam illis cænare incipientibus, ubi sermonem injecisset, quod ea Dea, cui ipse congrederetur, ad se venerit, subito domum pretiosis refertam poculis, & mensam omnifariam obsoniis, apparatuque magnifico plenam ostendisse.

Apulejus, qui & ipse hac arte infamis erat, cujusdam scæminæ meminit (d), quæ magicis artibus dedita homines ad amorem sollicitare, vel renuentes omnino solebat occidere: Maga primi nominis & omnis carminis sepulchralis magistra creditur, quæ surculis & lapillis, & id genus frivolis inhalatis omnem istam lucem mundi fideralis, imis tartari, & in vetustum Chaos submergere novit. Nam simul quemquam conspexit speciosæ formæ juvenem, venustate ejus capitur, & illico in eum & oculum & animum detorquet, serit blanditias, invadit spiritum, amoris profundi pedicis æternis alligat. Tunc minus morigeros & viles fastidians in saxa & in pecora quodvis animal puncto reformat, alios vero prorsus extinguit (e). Plures magicæ artis effectus alibi adstruit.

Medeam maleficam fuisse ex Sophocle ostendit Macrobius (\*): Medeam describit maleficas herbas secantem, sed averfam, ne vi no-

xii

---

(a) in Numa. (b) l. c. (c) l. c. (d) Lib. 2. de Asino aureo.  
(e) Lib. 1. de Asino aureo. (\*) Lib. 5. Saturn. c. 19.

xii odoris ipsa interficeretur, & succum quidem herbarum in cados æneos refundentem, ipsas autem herbas æneis falcibus execantem. Plures brevitas causa omitto, ut vel inde pateat, quidnam Gentiles unanimi prope consensu de Magia statuerint. Sed (inquies) quid affertur cæca gentilitas? Bene habet, certiora sectemur.

## ARTICULUS V.

### *De Sensu Judæorum de Magia practica.*

**Q**uidnam Judæi de artibus Magicis senserint, ipsa Scriptura sacra nos edocet: in lege siquidem data ad Mosem malefici jubentur occidi (f): *Maleficos non patieris vivere*. Clarius adhuc prohibitio exstat in libro Levitici his verbis (g): *Non declinetis ad Magos, nec ab Ariolis aliquid sciscitemini, ut polluamini per eos*. Unde verissime Origenes (h): *Esse hanc artem (magicam intelligit) designat etiam Scriptura, sed uti ea prohibet. Nam & dæmones Scriptura esse designat, sed coli eos & exorari vetat. Recte ergo etiam magica uti prohibet, quia Magorum ministri Angeli sunt refugæ & spiritus maligni & dæmonia immunda*.

Nec exempla scripturistica desunt, quæ de hac nos veritate convincant, ut enim Magos coram Pharaone reticeam, utpote quorum prodigia altera Dissertationis parte examinare contendam, insignem de Balaamo historiam sacræ referunt paginæ (i). Hic siquidem a Balaco Moabitarum Rege vocatus est, ut Israeliticæ genti imprecaretur pessima quæque, & sic electum hunc populum a terra Moab averteret. Sed nempe in contrarium versa sunt omnia, pro maledictione siquidem benedicere populo Balaamus coactus est factus derepente Propheta, & Salvatoris nostri JESU Christi prænuntius. Jam vero Balaamum & Magum fuisse & in sua arte non sterilem idem testatur Origenes (k): *Hic Balaam famosissimus erat*

(f) Exod. 22. v. 18.

(i) Num. 22.

(g) C. 19. v. 31.

(k) l. f. c.

(h) Tom. 1. hom. 13. in Num.



erat in arte magica, & in carminibus noxiis præpotens. Non enim habebat potestatem vel artem ad benedicendum, sed habebat ad maledicendum. Dæmones enim ad maledicendum invitantur, non ad benedicendum. Et ideo quasi expertus in talibus in opinione erat omnibus, qui erant in Oriente. Nisi enim experimenta ejus plurima processissent, quod frequenter maledictis hostem vertisset armatum, non utique præsumpsisset Rex hoc posse fieri sermonibus, quod ferro & acie vix posset impleri. Certus ergo Balach de hoc, & frequenter expertus omnis instrumentis & auxiliis bellicis mittit ad eum legatos.

Saul primus Regum in Israel omni virium conatu hujus furfuris homines exterminare conatus est, unde de ipso Scriptura (1): *Saul abstulit Magos & Hariolos de terra.* Verum (ut quotidiana est hominum inconstantia) postquam ab illo jam recesserat gratia, in idem scelus prolapsus est, & mulierem, quæ Pythonem habebat, accessit, ab eaque petiit, ut Samuelem fuscitaret ab inferis, qui ipsi futura prædiceret; quod & factum est, nam Samuel seu verus seu fictus apparuit, & miserando Regi & temporale & æternum prædixit exitium. Unde videmus, nequaquam sterilem hujus scæminæ artem fuisse. Si enim spectrum diabolicum erat, quod Sauli apparuit, habemus intentum, & clarescit virtus diabolicæ artis; si autem verus Samuel, ut ego defendo, virtute divina apparuit. Nil equidem in Prophetam Magia potuit, casus hic tamen sufficienter declarat hanc scæminam in fuscitandis mortuis sæpius fuisse versatam.

Liceat eruditionis gratia de hac Pythonissa pauca adnectere. Πυθων est græcum vocabulum, & idem ac serpentem significat, unde Apollo etiam Pythius dictus est teste Macrobio (m), cujus hæc verba sunt: *Latonæ Apollinem, Dianamque paritura Juno dicitur obstitisse, sed ubi quandoque partus effusus est, draconem ferunt, qui Πυθων vocitabatur, deorum cunas invasisse, Apollinemque in prima infantia sagitis belluam confecisse.*

Ab eodem serpente tandem triumphato etiam Pæanis nomen Apollo tulit, cum enim in pugna cum dracone subsisteret, mater Apollinis & alii, qui intererant prælio: *Ιε παῖα* clamabant, unde

---

(1) Lib. I. Reg. c. 28. v. 2.

(m) Lib. I. Saturn.

unde & de facto in proverbiiis est: *Dicite Io Pean*, quandocunque obtinetur victoria.

Mulier ergo Pythonissa illa dicebatur, quæ serpentis seu maligni spiritus ope prædicebat futura. Hæc a 70 Interpretibus 1. Reg. 28. *εγγαστριμυθός* seu ventriloqua dicitur, eoquod nempe spiritus malus mulieris corpus ingressus sua inde oracula funderet. Id ipsum ex Josepho (n) clarescit, qui, dum istam narrat historiam, tota explicatio similis in margine ponitur. Fusillime contra Celsum id narrat Origenes (o), & longum esset ipsius verba adducere. Etiam S. Chrysostomus (p) rei tam pudendæ meminisse non dubitat, quamvis lectoris verecundiæ consulat, dum paucis absolvit. Cælius Rhodiginus (q) ejusmodi sæminæ exemplum adducit his verbis: *Id, ne quis ut fabulosum risu excipiat, testatum volumus, tempestate hac, imo vero hæc prodente me fuisse in Patria mea mulierculam humili loco Jocabam nomine, ex cujus ventre immundi spiritus vocem prætenuem quidem, sed tamen, ubi vellet, dearticulatam, & prorsus intelligibilem audiivi ipse, verum & innumeri alii non Rhodigii modo, sed & tota fere Italia.*

Eundem fere in sensum loquitur Bernardus Lamy dicens, nomen hoc Magis tributum, eoquod eorum ventres uteri instar intumescerent, quando fundebant oracula. Et hæc per digressionem dicta sint.

Tertium Scripturæ exemplum Manasses est Regum impien-  
tissimus, sed simul pœnitentiæ veræ prototypus. Inter ejus scelera facer textus & istud commemorat (r): *Ariolatus est, & observavit auguria, & fecit Pythones, & aruspices multiplicavit, ut faceret malum coram Domino, & irritaret eum.* Vix ulla igitur erat Magiæ species, qua se Rex scelestissimus non polluerat. Divinationi vero, scribit eruditissimus Calmet (s), *Magiæ, & hujus generis superstitionibus plurimum addictus erat, pessimoque illius exemplo tota externorum vitiorum eluvio in regnum Juda irrupit, ut corrumpendis populis magis Manassis scelera, quam Chananæorum valerent.*

C

Nec

(n) Lib. 6. Ant. c. 15.

(o) Lib. 7.

(p) Tom. 4.

(q) Lect. Ant. lib. 8. c. 10.

(r) Lib. 4. Reg. c. 21. v. 6.

(s) Dict. Bibl. lit. M.



Nec mirari quenquam subeat Judaicum populum in hæc vitia fuisse prolapsum, cum enim continuo idola coleret, & pro Deo vero per summum scelus dæmonia adoraret, facile erat aliud cum diabolo commercium quærere. Frequenti liquidem fœdere Magia, & Idololatria junguntur.

## ARTICULUS VI.

### *De Sensu primorum Christianorum de Magia practica.*

**N**ec aliter Christiani, quam Judæi sensere, nam & novi Testamenti adsunt oracula, quæ hanc veritatem sufficienter reddant perspicuam. Notius liquidem nomen Simonis Magi est, quam ut de novo proferatur in medium. De hoc ita Scriptura (t): *Vir autem quidam nomine Simon, qui ante fuerat in Civitate Magus seducens gentem Samariæ dicens se esse aliquem magnum, cui auscultabant omnes a minimo usque ad maximum dicentes: hic est virtus Dei, quæ vocatur magna, attendebant autem eum, propter quod multo tempore magicis suis dementasset eos.* Hic ex Oriente Romam profectus est, quam adeo fascinauit, ut ipsum tanquam Deum agnosceret, & publica insuper statua honoraret. Id verbis Justinii Martyris recenset Fleurus (u): *Qualis fuit Simon Samaritanus ex oppido Gitton, qui sub imperio Cæsaris Claudii palam vénéficus, & dæmonio obsessus Romæ in vestra imperiali urbe pro Deo habitus est, & divinis honoribus cultus. Eidem enim statuum in Tiberi inter duos pontes mediam erexistis cum inscriptione latina: Simoni Deo sancto.* Hic (verbis eruditissimi Historici utor (x), promiserat se in omnium conspectu avolaturum, & in cælum ascensurum. Jamque re ipsa ope dæmonum elevabatur. Tum vero sancti Petrus & Paulus in genua procidentes simul orabant invocantes nomen JESU Christi. Illico hujus sanctissimi Nominis terrore fugatis dæmonibus Simon cecidit, & confractis cruribus jacebat in terra.

(t) Act. 8. v. 9, 10, & 11.

(x) Lib. 2. Hist. Eccles. §. 23.

(u) Lib. 3. Hist. Eccles. §. 40.

*terra.* Si vero sine miraculo humanum corpus transferri non potest a dæmone, quomodo ista salvari potest autoritas?

Alterius eadem Apostolorum Acta memoriam ingerunt (y): *Cum perambulassent universam Insulam usque Paphum, invenerunt quendam Virum Magum Pseudopphetam Judæum, cui nomen erat Bar-Jesu, qui erat cum Proconsule Sergio Paulo Viro prudente. Hic accersitis Barnaba & Saulo desiderabat audire verbum Dei. Resistebat autem illis Elymas Magus (sic enim interpretatur nomen ejus) quærens avertere Proconsulem a fide. En! conatum diaboli! sicut enim Moysi quondam & Aaroni resisterant Jannes & Mambre, sic Petro & Paulo Apostolorum Principibus Simon resistebat & Elymas, & quamvis id Scriptura non memoret, tamen vix est dubio locus, quin Simonis ad instar per mira quædam prodigia etiam Elymas fidem sibi conciliare studuerit. Alias certe Chrysostomus nequaquam Miraculum diceret, quod Proconsul non obstante Elyma Apostolos audire voluerit. Sane hic Doctor inter Simonem & Elymam paritatem instituit (z): Iterum Magus Judæus sicut Simon, & vide hunc, quando aliis quidem prædicabant: non valde indignantem, quando autem accesserunt Proconsulem, tunc indignati sunt. Miraculum autem est in Proconsule, quod præoccupatus illius magia voluit audire Apostolos. Ita & Samaritani fecerunt, & a comparatione victoria apparet, dum Magia vincitur.*

Aliam in iisdem Actis historiam legimus (a): Postquam Paulus Lydiam purpurariam ad Christianam fidem converterat, puella quædam spiritu Pythonico prædita illi obviam facta est; hæc vero divinationibus suis magnum heris suis quæstum causaverat, hæc Paulum continuo subsequens una voce clamabat (b): *Isti homines servi Dei excelsi sunt, qui annuntiant vobis viam salutis.* Sed Paulus hæc verba non amplius tolerans (c): *Spiritui dixit: præcipio tibi in nomine Jesu Christi exire ab ea.* Quod & illico factum est. Sed Domini puellæ futuro lucro frustrati Paulum & Silam perduxere ad Principes. Quid hoc? spiritum divinantem puella hæc ha-

C 2

buit,

(y) Act. 13. v. 6, 7, &amp; 8.

(b) l. c. v. 17.

(z) Tom. 3. hom. 28. in Acta.

(c) v. 18.

(a) Act. 16. a v. 16.



buit, divinationibus suis homines allexit, heros ditavit. Utique artem hanc magicam otiosam non dixeris.

De virtute magica extremis Ecclesiæ temporibus exercenda jam Christus ipse differuit (d): *Surgent pseudo-Christi, & pseudo-Prophetae, & dabunt signa magna, & prodigia, ita ut in errorem inducantur (si fieri potest) etiam electi.* Si autem ars Magica solis deceptionibus luderet, quomodo signa magna & prodigia diceret Christus? quomodo tantam in iis efficaciam fore agnosceret, ut ipsi etiam electi, si fieri posset, seductione pessima caderent? Quænam futura sint isthæc prodigia, dilectus Christi discipulus sequentibus explicat (e): Primum erit, ut se ipsum vel alium in hominum æstimatione defunctum sit resuscitaturus ad vitam: *Vidi unum de capitibus suis quasi occisum in mortem, & plaga mortis ejus curata est, & admirata est universa terra post bestiam (f).* Alterum erit, ut Eliæ ad instar ignem e cælo provocet: *Et fecit signa magna, ut etiam ignem faceret de cælo descendere in terram in conspectu hominum (g).* Tertium erit, ut statua Antichristi inanimata loquatur: *Et datum est illi, ut daret spiritum imagini bestiae, & ut loquatur imago bestiae (h).* Quæ omnia sane Magiam maxime activam probant.

Elegans pro mea sententia exemplum Ecclesiastica præbet historia, quam fusissime enarrat eminentissimus Cardinalis Gottus (i), ego vero in pugnum contraho: Cyprianus Antiochiæ nobili ortus genere jam a prima adolescentia Magiæ operam dabat, ita quidem, ut sub variis figuris eidem appareret diabolus, & ipse etiam prohibitu varias figuras assumeret. Contigit, ut Justinam Virginem & genere & forma præclaram juvenis quidam Aglaides nomine vehementissime deperiret. Sed cum invictum Virginis animum superare non posset, ad Cyprianum confugit obtenturus dæmonis ope, quod natura duce non poterat. Cyprianus mirum quantum gaudebat de petito auxilio utpote ejusmodi victoriis dudum alluetus. Nec mora: ex orco petit auxilium, ac impurissimos dæmones ad sollicitandam hanc castissimam Daphnen ablegat. Sed Virgo prudentif-

---

(d) Matth. 24. v. 24.

(e) Apoc. 13.

(f) l. c. v. 3.

(g) l. c. v. 13.

(h) l. c. v. 15.

(i) Tract. 8. de Rel. Christ. verit. c. 13.

dentissima divino confisa auxilio velut Marpesia cautes tot inter fluctus stabat intrepida. Cyprianus nequaquam cedendum ratus semetipsum transmutabat in foeminam, Aglaidem vero in passerem, ut ad fenestram Virginis volitaret, irritum tamen eventum, unde indignatus varios ei morbos immisit, in parentum illius greges defævit, jumenta occidit, pueros interfecit, jecora in mulieribus infpexit, & sexcenta alia ejusmodi crimina perpetravit. Sed frustra. Unde de novo dæmonem consulit. Sed hic infirmitatem suam confessus se contra Justinam utpote signo Christi munitam nil posse testatus est. Hoc audito Cyprianus meliora sapere, diabolo infirmitatem objicere, ad Christum accedere. Irritatus propterea dæmon Cyprianum suffocare volebat, sed invocato nomine Christi cogebatur recedere. Ille non jam Magus, sed Christianus unacum Justina Virgine ob Christi fidem comprehensus fuso pro Christo sanguine anterioris vitæ maculas diluit. En! Magiam quam maxime operantem. Multa hac in historia continentur, quæ meo instituto deserviunt. Potest igitur diabolus in assumpto corpore apparere hominibus, potest corpus de loco in locum transferre, potest homini morbos immittere, potest jumenta & greges occidere. Hæc tamen omnia mei adversarii negant.

Sane plurimum Magiam posse, gentilium unanimis erat persuasio, cum enim Christi Martyres cernerent in mediis tormentis illæfos, eum leonibus, urfis, tigridibus quasi colludentes, in aquis innoxios, magicis id artibus continuo tribuebant. Maxima cæcitate laborat, qui in sanctorum Martyrum actis ista non legit. Universalis igitur erat inter Gentiles persuasio Magiam quam maxime activam esse.

## ARTICULUS VII.

### *De Sensu SS. Patrum de Magia practica.*

**S**i ad Patres Ecclesiæ veniendum est, vix ullum puto invenies, qui meæ adversetur sententiæ, imo hanc eousque nonnulli defendunt, ut ipsos etiam Magos ad Domini præsepe vocatos



diabolicis artibus imbutos fuisse existiment. Ita videtur supponere S. Ignatius Martyr in sua epistola ad Ephesios (k). Ita defendit Justinus Martyr (l). Ejusdem est mentis Origenes (m). In hunc sensum & scribit Ambrosius (n). Nec abludit sanctus Basilius (o). Sed mittamus istos, propiora nostro quæramus proposito.

Tertullianus ita pro me solidissime (p): *Sciunt dæmones Philosophi Socrate ipso ad dæmonii arbitrium expectante. Quidni? cum & ipsi dæmonium adhæsisse a pueritia dicatur - - - Operatio eorum est hominis everfio - - - itaque corporibus quidem & valetudines insigunt, & aliquos casus acerbos, animæ vero repentinos & extraordinarios per vim excessus - - - momento ubique sunt. Totus orbis illis locus unus est, quid ubique geratur, tam facile sciunt, quam enuntiant. Sistamus paulisper in hoc textu, e quo primo discimus dæmones visibile cum hominibus habere posse commercium. Si enim Socrates dæmonem familiarem habuit, quis neget id aliis quoque posse contingere? Secundo dæmones posse corpus humanum variis morbis affligere, imo & in anima inexpectatos raptus causare. Tertio denique non omnes infernali carcere clausos teneri, sed in hoc orbe cum mira celeritate vagari, quæ puncta adversariorum systemati denuo adversari noscuntur.*

Audiat & S. Hilarius (q): *Ex libro Job docemur: cum enim diabolus potestatem tentandi Job postulasset per direptionem substantiæ ejus primum deserviturus, homines ad pastorum cædem & direptionem pecudum incitavit. Vi hujus textus potest permittente Numine diabolus bona nostra temporalia rapere, pecora interficere; cur non tempestatem causare & grandinem? Certe ad dissipandam Jobi substantiam ignem e cælo vocare permissus est. Hoc adversæ parti denuo displicet.*

Si sancti Athanasii opera pervolvere lubeat, plura invenire poterimus, quæ intento nostro deserviant. Is enim explicans, quas tentationes a dæmone S. Antonius tolerare debuerit, sic differit

(k) Tom. I. Bibl. PP.

(l) in Dial. cum tryphon. Tom. 2. Bibl. PP.

(m) Lib. I. adv. Celsum.

(n) Lib. 2. in Luc. Tom. 5.

(o) de humana Christi genenat.

(p) Apol. c. 22.

(q) in Psalm. 128.

ferit (r): Ille (diabolus scilicet) per noctes in pulchræ mulieris vertebatur ornatum nulla omittens figmenta lascivia. Quomodo hoc verum est, si dæmon tartareo clausus carcere visibili cum hominibus commercio caret? Sed pergamus in Athanasio. Cum ne sic quidem invictum Antonii animum frangeret (s): *Stridens dentibus, & ululans, qualis est merito, talis apparebat & vultu, puer horridus atque niger ad ejus se genua provolvens humana voce flebat.* Liceat hic quæstionem supra propositam iterato repetere: sed Antonio nec ad vanæ gloriæ vitium ullatenus inclinante alia dæmon arma assumpsit, de quibus ita Athanasius (t): *Ita eum aggregatis satellitibus suis varia cæde laceravit, ut doloris magnitudo & motum auferret & vocem. Nam & ipse postea referebat vulnera fuisse tam gravia, ut universa hominum tormenta superarent.* Hæc apparentia, puto, satis erat sensibilis. Sed & hæc omnia Antonium superare non poterant, unde novis opus erat insultibus, quos ita denuo Athanasius narrat (u): *Sonitus repentinus increpuit, ita ut loco funditus agitato parietibus patefactis multifaria dæmonum exinde turba se effunderet. Nam & bestiarum & serpentium formas induentes omnem protinus locum replevere phantasiis leonum, taurorum, luporum, aspidum, serpentum, scorpionum, nec non & pardorum, atque ursorum. Et hæc singula secundum suam fremebant naturam. Rugiebat leo occidere volens, taurus mugitu & cornibus minabatur, serpens sibilo personabat, luporum impetus inhiabat, pardus discolor a tergo authoris sui calliditates varias indicabat. Truces omnium vultus, & vocis horridæ dirus auditus. En! bestialem etiam præsentiam dæmonis! Nec infrequenter ejusmodi visitationes contingebant Antonio, nam ita Athanasius pergit (x): *Crebro Antonius talem a se visum diabolum asserebat, qualem & B. Job Domino revelante cognoverat. Oculi ejus ac si species Luciferi, ex ore ejus procedunt lampades incensæ, crines quoque incendiis sparguntur, & ex naribus ejus fumus egreditur quasi fornacis æstuantis ardore carbonum, halitus ejus ut pruna, flamma vero ex ore ejus glomeratur.* Habemus ergo in variis dæmonem apparere corporibus, & visibiliter conversari*

(r) in vita S. Antonii Abbat.

(u) l. c.

(s) l. c.

(x) l. c.

(t) l. c.



versari cum homine, quod Adversarii sustinere non possunt. Qui ex Athanasio plura desiderat, totam Antonii vitam sed attentus pervolvat.

Ut Athanasius de Antonio, ita de Hilarione Hieronymus (y): *Quadam nocte cepit infantum audire vagitus, balatus pecorum, mugitus boum, planctum quasi mulierum, leonum rugitus, murmur exercitus, & rursus variarum portenta vocum, ut ante sonitu, quam aspectu territus cederet.* Paulo inferius (z): *Multae sunt tentationes ejus, & die noctuque variae daemonum insidiae, quas, si omnes narrare velim, modum excedam voluminis. Quoties illi nude mulieres cubanti, quoties esurienti largissimae apparuere dapes? Interdum orantem lupo ululans, & vulpecula ganniens transilivit, psallentique gladiatorum pugna spectaculum praebebat, & unus quasi interfectus, & ante pedes ejus corruens sepulturam rogavit. Oravit semel fixo in terram capite, & ut natura fert hominum, abducta ab oratione mens nescio, quid aliud cogitabat, insiliit dorso ejus festinus gladiator, & latera calcibus, cervicem flagello verberans, eja, inquit, cur dormitas? Cacchinnansque desuper, cum defecisset, an hordeum vellet accipere, sciscitabatur. Haec, puto, visibilem daemonis praesentiam luculenter ostendunt.*

Mirum in modum ad rem meam facit historia, quam idem narrat Hieronymus (a): *Ejusdem Gazensis emporii oppido Virginem Dei vicinus juvenis deperibat, qui cum frequenter tactu, jocos, nutibus, fibilis, & ceteris hujusmodi, quae solent moriturae Virginitatis esse principia, nihil profecisset, perrexit Memphim, ut confesso vulnere suo magicis artibus rediret armatus ad Virginem. Igitur post annum doctus ab Aesculapii vatibus non remediantis animas, sed perdentis venit praesumptum animo stuprum gestiens: & subter limen domus puellae tormenta quaedam verborum, & portentosas figuras sculptas in aeris Cyprii lamina defodit. Illico insanire Virgo, & amictu capitis abjecto rotare crinem, stridere dentibus, inclamare nomen adolescentis. Magnitudo quippe amoris se in furorem verterat. Hoc maleficio fuisse quis neget? Pergit Hieronymus (b): *Perducta a Parentibus ad Monasterium seni traditur ululante statim & confitente daemone: vim sustinui, invitatus abdu-**

ctus

(y) Tom. 1. in vita Hilarionis Abbat. (a) l. c.

(z) l. c.

(b) l. c.

Etus sum, qui bene Memphi somniis homines deludebam. O cruces! o tormenta, quæ patior. Exire me cogis, & ligatus subter limen teneor. Non exeo, nisi me adolescens, qui tenet, dimiserit. Tunc senex: grandis, ait, fortitudo tua, quod licio, & lamina strictus teneris. Dic, quare ausus es ingredi puellam Dei? ut servarem, inquit, eam Virginem, tu servare proditor castitatis? cur non potius in eum, qui te mittebat, es ingressus? ut quid, respondit, intrarem in eum, qui habebat collegam meum amoris dæmonem? Noluit autem Sanctus, antequam purgaret Virginem, vel adolescentem, signa jubere perquiri, ne aut solitis incantationibus recessisse dæmon videretur, aut ipse sermoni ejus accommodasse fidem asserens fallaces esse dæmones, & ad simulandum esse callidos. Et magis reddita sanitate increpuit Virginem, cur fecisset talia, per quæ dæmon intrare potuisset. Hæc historia non pauca continet adverso systemati omnino contraria, & quidem primo per artes magicas carnalem posse amorem conciliari. Secundo dæmones divinare per somnia, 3tio quod dæmon ab homine intrudi possit in corpus alterius, quæ omnia Adversarii negant.

Mea principia etiam Epiphanius stabilit ita de Carpocratianis perorans (c): *Aggrediuntur hi, qui ex nefaria hac schola sunt, omni-genos conatus horribilium, ac perniciosorum operum. Magia enim apud ipsos excogitata est, incantationesque diversas ad omnem machinationem invenerunt ad amorem, & ad illecebrentia. Quin & assessores dæmones sibi ipsis attrahunt, ad hoc, ut per multas præstigias in magna potestate omnibus dominantur, quibus velint. Hic textus & dæmonum probat præsentiam & magicæ artis virtutem in ordine ad conciliandum amorem, neutrum adversarii probant.*

Eusebius Cæsareensis, postquam omnia Apollonii Thyanæi prodigia, quæ gentiles ipsis Christi miraculis opposuere, ex Philostrato narraverat, ita contra Hieroclem concludit (d): *Patere itaque, quod sæpe a nobis est dictum, cuncta illius miracula dæmonum ministeria esse. Ergo ipsius ars magica sterilis non erat, tot enim, ac tanta patravit prodigia, ut omnes in stuporem raperentur. Qui illa fufius scire desiderat, legat historiam Ecclesiasticam Fleurii (e),*

D

ego

(c) Hæref. 27.

(e) Tom. 1. lib. 1. §. 49.

(d) in Hieroclem in confut. lib. 6ti.



ego unum instituto meo magis deserviens affero: Cum Apollonius varia Ephesiis de cultu Deorum dogmata proponeret, juvenis quidam altius ridere cœpit. Apollonius non multum indignatus eum a dæmone obsessum dixit. Veritatem probavit eventus, nam illico manifesta inhabitantis dæmonis signa apparuere. Unde præcepit spiritui, ut exiret, & in signum egressus statuam non longe remotam everteret, quod & factum est. Concludit famosus historicus (f): *Si Apollonio cum dæmonibus necessitudo intercessit, sicut a Paganis incusabatur, credi potest inter se collusisse, ut ejus nutu intrarent in hominem, vel exirent, qua e glossa duo denuo discimus nempe & hominem posse pacisci cum dæmone, & dæmonem ab homine in alterius corpus posse intrudi.*

S. Gregorius de Antichristo discurrens stupenda illi prodigia tribuit (g): *Tantis signis & prodigiis in sanctitatis ostensione elevatur, ut argui ab homine ejus facta non valeant, quia cum potestate terroris jungit etiam signa ostensæ sanctitatis.* Hæc vero non meras sensuum illusiones fore jam supra ostendimus.

Favet nobis & S. Cypriani Authoritas ita scribentis (h): *Inde jam facultas datur immundos & erraticos spiritus, qui se expugnandis hominibus immerferint, ad confessionem minus increpantibus cogere, ut recedant, duris verberibus urgere, confluentes, ejulantes, gementes incremento pænæ propagantis extendere, flagris cedere, igne torrere. Quæso! quomodo urgebis diabolum, ut a te recedat, quomodo castigabis verberibus, quomodo flagello terrebis, si ille clausus inferno est? si nullum homines inter exercet commercium?*

Accedat denique & maximum Ecclesiæ columnen Augustinus (i): taceo quid ipso teste dæmones possint in fœminas, verecundiæ siquidem lectoris consulere statui (k). Postea vero de Antichristi discurrens miraculis ex libro Job manifeste ostendit dæmonem vera posse patrare prodigia: *Tunc solvetur Satanas, & per illum Antichristum in omni sua virtute mirabiliter quidem sed mendaciter operabitur. Quod solet ambigi, utrum propterea dicta sint signa & prodigia*

(f) l. c.

(i) Tom. 5. lib. 15. de Civit. c. 23.

(g) Tom. 2. lib. 15. moral. c. 36.

(k) l. c. lib. 20. de Civit. c. 19.

(h) in Epist. ad Donat.

digia mendacii, quoniam mortales sensus per phantasmata decepturus est, ut quod non facit, facere videatur. An quia illa ipsa, etiamsi erunt vera prodigia, ad mendacium pertrahent credituros, non ea potuisse nisi divinitus fieri virtutem diaboli nescientes, maxime quando tantam, quantum nunquam habuit, accipiet potestatem. Non enim quando e caelo ignis cecidit, & tantam familiam cum tantis gregibus pecorum sancti Job, uno impetu absumpsit, & turbo irruens, & domum rejiciens filios ejus occidit, phantasmata fuerunt opera Satanae, cui Deus dederat hanc potestatem. Vides ergo ad mentem Aurelii diabolum non phantastice solum, sed & vere operantem.

Inferius autem, ubi de Veneris phano & ardente lucerna nulla tempestate, nullo imbre delenda respondet, ita ad scopum meum effatur (1): De isto autem phano Veneris & lucerna inextinguibili non solum in nullas coarctamur angustias, verum etiam latitudinis nobis campus aperitur. Addimus enim ad istam lucernam inextinguibilem & humanarum & magicarum, id est per homines daemoniacarum artium, & ipsorum per se ipsos daemonum multa miracula, quae, si negare voluerimus, eidem ipsi, cui credimus, sacrarum litterarum adversabimur veritati. Aut ergo in lucerna illa mechanicum aliquid de lapide Asbesto ars humana molita est, aut arte magica factum est, quod homines illo mirarentur in templo, aut daemon quispiam sub nomine Veneris tanta se efficacia praesentavit, ut hoc ibi prodigium, & appareret hominibus, & diutius permaneret. Illiciuntur autem daemones, ad inhabitandum per creaturas, quas non ipsi, sed Deus condidit, delectabilibus pro sua diversitate diversis, non ut animalia cibus, sed ut spiritus signis, quae cujusque delectationi congruunt per varia genera lapidum, herbarum, lignorum, animalium, carminum, rituum. Ut autem illiciantur ab hominibus, prius eos ipsi astutissima calliditate seducunt vel inspirando eorum cordibus virus occultum, vel etiam fallacibus amicitiiis apparendo, eorumque paucos discipulos suos faciunt, plurimorumque doctores. Neque enim, potuit nisi primum ipsis docentibus disci, quid quisque illorum appetat, quid exhorreat, quo invitetur nomine, quo cogatur, unde magicæ artes, earumque artifices extiterunt. Maxime autem possident corda mortalium, qua potissimum possessione gloriantur, cum se transfigurant in Angelos lu-

D 2

cis.

---

(1) Lib. 21. de Civit. c. 6.



*cis.* Sunt ergo facta eorum plurima, quæ quanto magis mirabilia confitemur, tanto cautius vitare debemus. Hic textus plura nos edocet, quæ cum adversariorum systemate nequaquam combinari possunt. Primo asserit S. Patër, qui negat per dæmones patrari posse miracula in sensu scilicet laxiori accepta, contradicit Scripturæ, 2do ait dæmones apparere hominibus & fallacibus amicitiiis illos decipere. 3tio Allici rebus corporeis tanquam signis. 4to Hæc signa homines didicisse a diabolis, ut his positis compareant, & sic pacti & expressi & taciti meminit. Hæc autem omnia eruditi Authores & negant, & pernegant.

## ARTICULUS VIII.

### *De Sensu S. Thomæ Aquinatis, aliorumque Doctorum de Magia practica.*

**A**ugustino Magistro Thomam subjungo discipulum, quorum auctoritas, quamvis semper maxima fuerit, modernis tamen temporibus ad supremum est evecta fastigium, cum nullus modo Theologorum sit, qui non Augustino & Thoma Ducibus gloriari contendat. Thomas igitur per maleficium impediri posse maritalem copulam sat fuse ostendens hæc habet (m): *Dicendum, quod quidam dixerunt, quod maleficium nihil erat in mundo, nisi in æstimatione hominum, qui effectus naturales, quorum causæ sunt occultæ, maleficiis imputabant, sed hoc est contra auctoritates Sanctorum, qui dicunt, quod dæmones habent potestatem supra corpora, & supra imaginationem hominum, quando a Deo permittuntur; unde per eos malefici signa aliqua facere possunt. Procedit autem hæc opinio ex radice infidelitatis, sive incredulitatis, quia non credunt esse dæmones nisi in æstimatione vulgi tantum, ut terrores, quos homo sibi ipsi facit, ex sua æstimatione imputet dæmoni, & quia etiam ex imaginatione vehementi aliqua figuræ apparent in sensu tales, quales homo cogitat, & tunc creduntur dæmones videri. Sed hæc vera fides repudiat, per quam Angelos de cælo cecidisse &*  
dæmo-

---

(m) in 4. Sent. dist. 34. A. 3. in ☉

dæmones esse credimus, & ex subtilitate suæ naturæ multa posse, quæ nos non possumus, & ideo illi, qui eos ad talia facienda inducunt, malefici vocantur. En! juxta D. A. datur maleficium, juxta Adversarios non datur maleficium. Juxta Thomam dæmones habent potestatem in corpora, juxta adversarios non habent. Juxta Thomam Deus permittit hanc potestatem, juxta Adversarios salvis perfectionibus permittere non potest. Juxta Thomam malefici inducunt dæmonem ad causanda maleficia, juxta Adversarios non possunt inducere. Quis ex his loquitur veritatem?

Pacti vero & expressi, & taciti cum dæmone initi idem Angelicus meminit, cum enim dixisset non licere uti auxilio dæmonum ad corporales effectus ita demum subjungit: *Similiter etiam in aliis operibus magicis, in quibus complementum operis ex virtute dæmonum expectatur, in his enim omnibus est apostasia a fide per pactum initum cum dæmone. Vel verbotenus, si invocatio intersit, vel facto aliquo, etiamsi sacrificia defint.* D. A. aperte contradicunt adversæ partis Patroni.

Idem Angelicus, postquam sufficienter ostenderat vera per dæmones miracula fieri non posse, sed hæc dextram Omnipotentis requirere, postquam declaraverat simul vires diabolicas nequaquam transcendere, ut patrent miracula in sensu largiori accepta talia scilicet, quæ vires hominis superent, ita subjungit (n): *Sciendum est tamen, quod quamvis hujusmodi opera dæmonum, quæ nobis miracula videntur, ad veram rationem miraculi non pertingant, sunt tamen quandoque veræ res. Sicut Magi Pharaonis per virtutem dæmonum veros serpentes, & ranas fecerunt, & quando ignis de celo cecidit, & familiam Job cum gregibus pecorum uno impetu consumpsit, & turbo domum dejiciens filios ejus occidit, quæ fuerunt opera Satanae, phantasmata non fuerunt, ut Augustinus dicit 20. de Civit. Dei.* Thomas igitur opera dæmonum asserit non semper esse phantastica, Adversarii contrarium volunt.

Doctorem Angelicum Theologi omnes sequuntur, ita ut vix ullum invenias, qui in Tractatu de virtute Religionis contra maleficia non præscribat remedia. Inquisitores pariter Viri & in Theo-

D 3

logia

---

(n) 1. P. quæst. 114. A. 4. in ☉



logia & jure peritissimi, optimæ insuper famæ & morum innocentia clari id unanimi ore testantur, testes alii de visu accedunt innumeri, sagæ ipsæ semetipsas accusant, quando ipsæ manus justitiæ incidunt; experientia suffragatur continua, leges & Canonicae & Civiles contra maleficos pœnas gravissimas statuunt. Homines pene omnes tam plebeji, quam nobiles de hac veritate non dubitant, ut adeo unanimem fere ad hæc usque tempora hominum consensum liceret adducere, quod diabolicis artibus multa ab hominibus mira patrentur, damna inferantur, morbi causentur, & alia. Jam ex hucusque sat fuscæ ostensis cum eruditissimo Patre Honorato a S. Maria (o) liceat argumentum quoddam reflexum adducere, quod meo quidem judicio (salvo semper meliori) tam facile nullus everterit. Est autem sequentis tenoris.

## ARTICULUS IX.

### *Proponit Argumentum reflexum ex hucusque dictis.*

**N**ulla traditio omni antiquitate ab ipsis statim diluvii temporibus inchoata, testimonio Gentilium fere omnium roborata, sacrae Scripturae Oraculis confirmata, unanimi Judæorum consensu solidata, a Christianis fere omnibus approbata, in scriptis SS. PP. fundata, in actis SS. Martyrum explicata, inter Doctores scholasticos & Theologos ferme indubitata, a sacris Inquisitoribus & Judicibus millies ratihabita, quotidianis insuper tum plebejorum, tum nobilium experimentis stabilita everti potest, ac rejici, nisi vel illius vitiata origo possit ostendi, vel talia contra illam afferantur momenta, quæ omnem probabilitatis lineam mille parasangis excedant, & omnino demonstrativa esse noscantur; alias siquidem omnia antiquitatis monumenta nutabunt, & firmam amplius in rebus historicis regulam sequi non poteris. Quid enim, amabo, facilius quam leves quasdam conjecturas adducere, & sic, si nil valet traditio unanimi consensu firmata, rem omnibus certam prope singulis dubiam reddere?

Sed

---

(o) Tom. 2. animadvers. in reg. & usum Crit. lib. 2. dissert. 2. A. 4. & 5.

Sed (sit venia verbo) clarissimi Authores in suis operibus nequaquam ostendunt traditionis hujus vitiatam originem (traditionem siquidem esse & vetustissimam quidem præcedentes Articuli remonstrabant) sed tantummodo ad præjudicia recurrendum existimant, quibus plerosque mortalium fascinos credunt. Sed an id de tota antiquitate, de tot Viris omni exceptione majoribus, de sanctis Patribus, Doctore Angelico, aliisque Theologis, imo tot testibus etiam de visu prudenter, supponi possit, aliis dijudicandum relinquo.

Nec ex parte altera illorum momenta ejus mihi efficaciam esse videntur, ut sententiam in traditione fundatam aperte de falsitate convincant. Autoritas, cui nituntur, quamvis gravem esse non denegem; si tamen comparetur cum nostra, exigua est modicaque; quid enim quatuor vel quinque Viri, & ne hi quidem omnes Theologi ad infinitam quasi aliorum Authorum myriadem, quid ad integram SS. Patrum catervam, quid ad Thomam Aquinatem, quid ad omnes prope Theologos, qui Angelicum hunc Ducem hac in parte uno ore sequuntur?

Conjecturæ ipsorum tantæ sunt, ut quamvis primo intuitu graves appareant, non tamen difficulter solvantur. Hi vero Autoritas nempe & Conjectura duo sunt artis Criticæ oculi, qui, si caligent, totum utique fundamentum ruat, necesse est. Ne vero plausibilis ista, quam verius dicta sint, pressio illorum momenta modo pede sequamur.

## ARTICULUS X.

### *Dissolvit Momenta contraria.*

**Q**uod eruditi Authores homines dari defendant, qui semet ipsos dæmoni devovent, illius implorant auxilium, ac illius ope mira patrare conantur, tantum abest, ut ab illis dissentiam, ut etiam pedibus, manibusque adstipuler. Quod vero omnes ipsorum conatus mere phantasticos asserant, & magicas artes



tes omni efficacia destitutas affirmant, id enimvero discordiæ potum est, quod modo enucleare præsumo.

Ac inprimis quidem non capio, quidnam allata de somniorum interpretibus paritas velit. Non enim quamcunque somniorum interpretationem rejicient, sic enim sacris aperte oraculis contradicerent (p): quis enim Josephi Ægyptiaci somnia? quis genuinam eorum interpretationem ignoret? Sane in sacris paginis peregrinus est, qui somnia Nabuchodonosoris nesciat, qui Danielis non sciat oracula (q). Si vero iisdem de somniis mere naturalibus, vel immixtis a dæmone sermo est, non diffiteor nil his esse credendum, affirmo & assero quam maxime superstitiosum esse ex his velle futura cognoscere. Si tamen existimant divinationem factam ex somniis semper falsam fuisse, vel invitus in partes contrarias abstrahor: audiamus siquidem quid de his antiqui Scriptores.

Ovidius narrat, quod mater Paridis adhuc prægnans in somnio sibi visa fuerit parere ingentem flammam. Illa (ut par erat) perterrita, marito refert, ille vatem consulit, qui respondit fatale hoc somnium esse, & propter eum, quem Regina suo gestaret in utero, Trojam in cineres redigendam esse. Audiamus Paridem apud eundem Poetam de se ita canentem (r):

Matris adhuc utero partu remorante tenebar,  
 Jam gravidus justo pondere venter erat.  
 Illa sibi ingentem visa est sub imagine somni  
 Flammiferam pleno reddere ventre facem  
 Territa confurgit, metuendaque noctis opacæ  
 Visa seni Priamo, vatibus ille refert.

Arsum Paridis vates canit Ilion igni.

Veritatem probavit eventus, ob raptam siquidem a Paride Helenam Trojanum bellum exarsit, quo tandem urbs Asiæ nobilissima capta, incensa, eversa est.

Nec minus mirabile Æneæ somnium recenset Virgilius (s):

Nox erat, & terras animalia fessa per omnes  
 Alituum, pecudumque genus sopor altus habebat,

Cum

---

(p) Gen. 36. & 41.

(q) Dan. 2. & 4.

(r) in epist. Heroid.

(s) Æneid. lib. 8.

Cum Pater in ripa, gelidique sub ætheris axe  
Æneas tristi turbatus pectora bello.  
Procubuit, feramque dedit per membra quietem.  
Huic Deus ipse loci fluvio Tiberinus amœno  
Populeas inter senior se attollere frondes  
Visus, eum tenuis clauco velabat amictu  
Carbasus, & crines umbrosa tegebat arundo:  
Tunc sic affari, & curas his demere dictis  
O fate gente Deum, Trojanam ex hostibus urbem  
Qui revelhis nobis, æternaque Pergama servas  
Expectate solo Laurenti, arvisque latinis,  
Hic tibi certa domus, certi, ne absiste penates  
Neu belli terrere minis, tumor omnis, & iræ  
Concessere Deum.

Jamque tibi ne vana putes hæc fingere somnum  
Littoreis ingens inventa sub ilicibus Sus  
Triginta capitum fœtus enixa jacebit  
Alba solo recubans, albi circum ubera nati.  
Hic locus urbis erit, requies ea certa laborum:  
Ex quo ter denis urbem redeuntibus annis  
Afcanius clari condet cognominis urbem.

Nec vaticinio veritas defuit, ita enim idem Poeta:  
Ecce! autem subitum, atque oculis mirabile monstrum:  
Candida per sylvam cum fœtu concolor albo  
Procubuit, viridique in littore conspicitur Sus.

Somnia non omnia optato carere effectu etiam Propertius indicat  
(t):

Nec tu sperne piis venientia somnia portis  
Cum pia venerunt somnia, pondus habent.

Id ipsum sentit & Claudianus hoc disticho (u):

Additur ecce! fides, nec me mea ludit imago  
Irrita nec falsum somnia misit ebur.

Mirabile somnium reipsa impletum recenset Justinus historicus de

E

Rege

---

(t) Lib. 4. eleg. 7.

(u) Præfat. in 6tum consulat. Honorii.



Rege Aftyage sequentis tenoris (x): *Post multos dein Reges per ordinem successionis regnum ad Aftyagem descendit. Hic per somnium vidit ex naturalibus filia, quam unicam habebat, vitem enatam, cujus palmitate omnis Asia obumbrabatur. Consulti Arioli ex eadem filia nepotem ei futurum, cujus magnitudo prænuntietur, regnique ei amissionem portendi responderunt. Quod in Cyro Mandanæ filio & primo Persarum monarcha impletum est. Plura ejusmodi recenset Valerius Chaximus; ego tria tantum adduco, quæ eventum prædictum sortita sunt (y). De Augusto, quod Artario medico suo non crediderat, ita Valerius: Audiverat Divi Julii Patris sui uxorem Calpurniam nocte, quam is ultimam in terris egit, in quiete vidisse, multis eum confectum vulneribus in sinu suo jacentem, somniique atrocitate vehementer exterritam rogare non destitisse, ut proxima die a curia se abstineret. At illum, ne muliebri somnio motus id fecisse existimaretur, senatum, in quo parricidarum manus allatae sunt, adire contendisse. En! verum quamvis tragicum somnii exitum.*

Alterum exemplum de C. Graccho idem Author enarrat (z): *Cajo autem Graccho imminentis casus atrocitas palam atque aperte per quietem denuntiata est. Somno enim pressus Tiberii Gracchi fratris effigiem vidit dicentis sibi: nulla ratione eum vitare posse, ut eo fato non periret, quo ipse occidisset. Id ex Graccho, priusquam tribunatum, in quo fraternalium exitum habuit, iniret, multi audiverunt. Cælius etiam certus Romanæ historiæ author sermonem de ea re ad suas aures illo adhuc vivo pervenisse scribit.*

Simile refert de Alcibiade his verbis (a): *Alcibiades quoque miserabilem exitum suum haud fallaci nocturna imagine speculatus est. Quo enim pallio amicæ suæ dormiens opertum se viderat, eo interfectus & inssepultus jacens contactus est.*

Nimis longum esset Scipionis somnium enarrare, quod diffusissime præstat Macrobius (b).

Unum adhuc unicum superaddo ex Cælio Rhodigino satis mirabile (c): *Ad conjectorem detulit quidam somniasse se ovum pendere*

ex

(x) in trag. Pomp. hist. lib. I.

(y) Lib. I. c. 7.

(z) l. c.

(a) l. c.

(b) a f. I.

(c) Lect. antiq. lib. 27. c. 14.

ex fascia lecti sui cubicularis. Respondit is latere sub lecto infossum thesaurum. Fodit, auri aliquantulum invenit idque argento circumdatum. Conjectori misit de argento, quantum est visum. Tum ille: nihilne (inquit) de vitello? Ergo quamvis superstitiosum sit divinare ex somniis, non tamen semper fallunt somniorum interpretes, nec semper diabolus, ne omnem apud sibi devotos fidem amittat.

De auguriis & auspiciis idem omnino dicendum est; quis enim approbet illa, quæ Scriptura ipsa tanquam superstitiosa condemnat? Cave, monentis verba sunt Spiritus sancti (d), ne imitari velis abominationes illarum gentium, nec inveniatur in te, qui lustrat filium suum, aut filiam ducens per ignem, aut qui Ariolos sciscitetur, & observet somnia, atque auguria, nec sit maleficus. Nota mihi est S. Augustini parœmia ita loquentis: Omnes artes hujusmodi vel nugatoriae, vel noxiæ superstitionis ex quadam pestifera societate hominum & demonum, quasi pacta infidelis & non dolosæ amicitiae constituta penitus sunt repudianda, & fugienda Christiano. Et jure merito: quid enim, quæso, garritus vel volatus avium de se mihi possit portendere, quomodo cum hoc, vel illo effectu connecti?

Si tamen ex auguriis, auspiciisque nunquam secutam veritatem existimes, ipsimet Augustino opponeris. Is enim ipse sic habet (e): Quibus illusionibus & deceptionibus evenit, ut istis superstitionis & perniciosis divinationum generibus multa præterita & futura dicantur, nec aliter accidunt, quam dicunt, multaque observantibus secundum observationes suas eveniant, quibus implicati curiosiores fiant, & sese magis, magisque inserant multiplicibus laqueis perniciosissimi erroris. Hoc genus fornicationis animæ salubriter divina Scriptura non tacuit, neque ab ea sic deterruit animam, ut propterea talia negaret esse sectanda, quia falsa dicuntur a Professoribus eorum, sed etiamsi dixerint vobis, inquit, & ita evenerit, ne credatis eis.

Enimvero si Poetas, si Historicos velimus consulere, ejusmodi auguriis, auspiciisque eventum respondiisse legemus. Virgilius, cum descensum Æneæ ad inferos eleganti depingeret carmine, columbarum meminit, quarum auspiciis aureum de arbore ramum Æneas decerpere poterat (f):

E 2

Vix

(d) Deut. 18. v. 9. &amp; 10.

(e) l. c.

(f) Lib. 6. Æneid.



Vix ea fatus erat, geminæ cum forte columbæ  
 Ipsa sub ora Viri cœlo venere volantes  
 Et viridi federe solo, tum maximus heros  
 Maternas agnoscit aves, lætusque precatur:  
 Este Duces; o si qua via est, cursumque per auras  
 Dirigite in lucos, ubi pinguem dives opacat  
 Ramus humum, tuque o dubiis ne defice rebus  
 Diva Parens: sic effatus vestigia preffit  
 Observans, quæ signa ferant, quo tendere pergant.  
 Pascentes illæ tantum prodire volando,  
 Quantum acie possent oculi servare sequentum.  
 Inde ubi venere ad fauces graveolentis Averni,  
 Tollunt se celeres, liquidumque per aera lapsæ  
 Sedibus optatis gemina super arbore fidunt.  
 Discolor unde auri per ramos aura refulsit.

Hæc fabula est, historiam audiamus, quam recenset Valerius Maximus (g): *Tiberius Gracchus, cum ad res novas pararetur, auspicia domi prius a luce petiit, quæ illi perquam tristia responderunt, & janua egressus ita pedem offendit, ut digitus ei decuteretur. Tres deinde corvi in eum adversum occinentes partem tegulæ decussam ante ipsum prætulerunt, quibus ominibus contemptis a Scipione Nassia Pontifice Maximo decussus Capitolio fragmento subsellii ictus procubuit.*

Ejusdem tristitiæ casus Lucium Junium oppressit, de quo ita Author præfatus (h): *Lucius Junius P. Clodii collega neglectis auspiciis classem tempestate amisit, damnationisque ignominiam voluntaria morte prævenit.*

Nec quid lætius de Cicerone refertur (i): *Marco Ciceroni mors imminens auspicio prædicta est, cum enim in Villa Cajetana esset, corvus in conspectu ejus horologii ferrum loco motum excussit, & protinus ad ipsum tetendit, ac laciniam togæ eousque morsu tenuit, donec servus ad occidendum eum milites venisse nuntiaret.*

Lætiora Numæ Pompilio fuere auguria. Is enim, an re vera ad Romanorum sceptrum vocatus esset, scire percupiens, Deos volebat consulere (k): *Auguribus igitur, Sacerdotibusque as-*  
sumtis

---

(g) Lib. I. c. 4.    (h) l. c.    (i) l. c.    (k) Plutarchus in Numa.

*sumtis Capitolium ascendit (id Tarpejum collem tunc Romani appellabant) ubi, qui auguribus præerat, illum velato capite ad meridiem vertens, ipse autem retro manens, & ejus caput dextra manu tenens precatus est, & contra quam longissime oculi ferebant prospectum, quæ a Diis immortalibus auspicia, signave mitterentur, circumlustrabat. Silentium summum tanta in multitudine forum tenebat cunctis eventum observantibus, & de futuro suspensis. Ac mox cum bonæ aves, dextræque apparuissent, insignia ei tradiderunt. Veritatem augurii eventus ostendit, plus enim Pompilius pace, quam Reges alii bello utut victores Reipublicæ profuit.*

Rem omnino stupendam, & fere miraculo similem Dionysius Halicarnassensis recenset (1): Navius, cum aliquando Tarquinius ad veteres Equitum Centurias tres novas ex recenti delectu a se habito adderet, illasque Centurias a se additas de suo, suorumque amicorum nomine appellare vellet, solus ei fortiter est adversatus non finens quidquam ex Romuli institutis ab eo mutari. Rex autem iratus, quod ab eo impeditus fuisset, & infensus Navio conatus est vanitatem ejus artis arguere, eamque eludere, quasi ille tantummodo se jactaret, & nihil veri diceret. Hæc animo agitans vocavit Navium ad tribunal præsentem magna turba, quæ in foro erat. Cum autem eos, qui circum circa astabant, præmonuisset, quæ ratione speraret fore, ut augur ille vanitatis a se argueretur, postquam accessit, eo comiter salutato: nunc, inquit, est tempus o Navi, ut demonstrates, quam peritus sis artis divinandi. Cum enim rem magnam aggredi in animo habeam, an ea fieri possit, scire volo, quare abi, & consultis avibus ocyus redi. Ego vero hic sedens te expectabo. Vates imperata fecit, nec multo post rediit, & fausta auguria se accepisse dixit, affirmavitque rem fieri posse. Tunc Tarquinius ob eam orationem ridens, & ex sinu depromens novaculam & cotem ei dixit: jam certe Navi, patet te nobis imponere, & contra Numen mentiri manifeste, quando res, quæ nullo modo fieri possunt, fieri posse ausus es affirmare. Atqui hoc animo agitavi, an hac novacula cotem mediam percutiens discindere possem. Tunc exorto risu inter omnes, qui tribunal circumstant, Navius nihil eo ludibrio & tumultu turbatus dixit: Tarquini, cotem, ut mente concepisti, confidenter feri, dividetur enim, aut quidvis

---

(1) Rom. antiq. lib. 3.



*perpeti sum paratus. Rex autem vatis confidentiam admiratus cotem novacula percussit. Porro ferri acies toto lapide penetrato cotem divisit, & partem manus, quæ eam tenebat, scidit. Cæteri igitur omnes conspecta hac re admiranda, & vix credenda stupefacti clamorem sustulerunt. Habemus igitur augurem & vera dicentem, & mira facientem.*

Si ad Astrologos devenire necesse sit, eadem iterato erit responsio, quamvis enim multi eventus necessarii ex astris portendi possint, ut hodierna Mathesis ostendit, effectus tamen contingentes, & a libera causa manantes ex siderum motu pro certo prædici non possunt, hoc ipso enim eventus essent necessarii, non liberi, non contingentes; unde non mirum artem hanc astrologicam & a Scriptura, & a Patribus, atque Conciliis fuisse damnatam. Si tamen quis denuo velit prætereundum nihil unquam veri ex astris prædictum fuisse, decipitur, nam Asclepiades quidam Mathematicus proprium suum interitum ex astris prædixit, de quo ita Suetonius (m): *Hunc delatum, nec inficiantem jactasse se, quæ prævidisset ex arte, sciscitatus est (Domitianus) quis ipsum maneret exitus, & affirmante fore, ut brevi laceraretur a canibus, interfici quidem sine mora, sed ad coarguendam temeritatem artis sepeliri quoque accuratissime imperavit, quod, cum fieret, evenit, ut repentina tempestate dejecto funere semivivum cadaver discernerent canes.*

Stellam medio etiam die apparentem imperium Honorii portendisse Claudianus affirmat (n):

Nec certius unquam

Hortati superi, nullis præsentior æther  
Affuit ominibus, tenebris involverat atris  
Lumen hyems, denfosque notus collegerat imbres.  
Sed mox cum solita miles te voce levasset.  
Nubila dissolvit Phœbus, pariterque dabantur  
Sceptra tibi, mundoque dies caligine liber,  
Phosphorus adversam patitur Calcedona cerni.  
Nec tantum vicina nitent, sed tota repulsis  
Nubibus exiit Thrace, pangæa renident,  
Insuetosque palus radios Mæotica vibrat,

Nec

---

(m) in Domitiano.

(n) de 4to consulatu Honorii.

Nec Boreas nimbos, aut sol ardentior egit:  
 Imperii lux illa fuit, præfagus obibat  
 Cuncta nitor, risitque tuo natura sereno.  
 Visa etiam medio populis mirantibus audax  
 Stella die, dubitanda nihil, nec crine retuso  
 Languida, sed quantus numeratur nocte Bootes,  
 Emicuitque plagis alieni temporis hospes  
 Ignis, & agnosci potuit, cum luna lateret,  
 Sive Parens Augusta fuit, seu forte reluxit  
 Divus avus, seu te claris properantibus astris  
 Cernere sol patiens cœlum commune remisit.  
 Apparet, quid signa ferant.

Mirabile quid ex Porphyrio narrat Eusebius (o): *Cum ex Apolline quæreretur, maremne an feminam in utero habens mulier pareret? feminam respondit, idque a conceptionis tempore percepisse declarat dicens: non sperato marem Phæbe, cum Aræes Cypriæ radiis tenebratur. Et hæc non veritatis, sed eruditionis hauriendæ gratia dicta existimes.*

Sed his omiſſis ad rei substantiam accedamus. Est ergo Magia diabolica ars, vi cujus ope dæmonis mira patrantur. Cum vero hoc neutiquam possit contingere absque eo, quod homo vel expresse vel tacite paciscatur cum dæmone, definitionem ab Adversariis adductam intactam relinquo; conditiones vero, quas afferunt, saltem possibiles esse ostensurus inferius.

Jam vero istud hominis cum dæmone pactum aggrediuntur bifariam. Vel enim (inquiunt) ad solam invocationem hominis dæmon apparet? vel per operationes magicas ad præsentiam cogitur? Cogi dæmon nequaquam potest, cum inter verba, circulos, aliaque corporea, & dæmonem inter, qui merus est spiritus, non intercedat proportio, nec credi oportet superbissimum spiritum unius vetulæ imperio velle subditum esse. Nec etiam ultronee præsens apparet, cum enim damnatus sit spiritus, visibili cum hominibus consortio caret, nec potest pro libitu corpus assumere; cum hæc illi potestas per Christum adempta sit. Et si posset, quæ-

so,

---

(o) Lib. 6. de præparat. Evang. c. 1.



so, quis illius posset declinare insidias? Non posse, vel ipsi Magi fatentur, qui ab ipso dæmone se desertos fuisse testantur, ubi illius eguissent auxilio. Ita pactum cum dæmone expressum impugnant.

Ego vero in contrarium assero & dæmonem apparere hominibus, & homines cum dæmone posse pacisci. Utrumque & sacrarum Scripturarum evincunt oracula, & SS. PP. effata, & Ecclesiastica testatur historia. Quando Salvator noster quadraginta diebus & noctibus in deserto jejuniis & orationi vacabat, scribit Evangelista (p): *Accedens tentator dixit ei: Accessit (ait Ven. Beda (q) per assumptam speciem tentandi permissione, qui longe erat voto malitiæ. Lege sis etiam historiam Cypriani & Justinæ Martyrum Art. 6to citatam, lege vitam Antonii & Hilarionis Abbatum a SS. Athanasio & Hieronymo conscriptam, & leges sæpissime dæmonem apparuisse hominibus. Pactum denuo ex Evangeliiis discimus, in quibus ista narrantur (r): Assumpsit eum diabolus in montem excelsum valde, & ostendit ei omnia regna mundi & gloriam eorum, & dixit ei: hæc omnia tibi dabo, si cadens adoraveris me. Nunquid hæc verba denotant dæmonem cum Christo paciscentem? Vel edic: nonne contractus in jure innominatus est: Do, ut facias? Quamvis Christus ex parte altera oblatam sibi hanc gloriam repudiaverit. Lege eandem Hieronymi historiam supra adductam, in qua se juvenis devovit diabolo, ea tamen conditione, ut Virginem, quam deperibat, ad sui amorem pelliceret. Quid, quæso, ad rationem pacti hic deficit?*

Plus meo conducit proposito historia relata a Surio ex Metaphraste sequentis tenoris (s): Erat Theophilus quidam Oeconomus Adanensis Ecclesiæ Vir & morum probitate, & rerum agendarum dexteritate conspicuus. Is (ut commune hominibus vitium est detractio) innocenter apud Episcopum denigratus non tantum famæ, sed & muneris naufragium passus est. Ægerrime casum hunc ferebat Theophilus, & vindictæ stimulis excitatus (quo enim non impellit immoderata tristitia?) flectere cum superos non posset, Acheronta movere constituit. Judæum proin artis magi-

(p) Matth. 4. v. 3.

(q) Tom. 5. in c. 4. Matth.

(r) Matth. 4. v. 8. & 9.

(s) Tom. 1. mensis Febr. die 4ta.

magica peritissimum concubia nocte accedit, causam adventus explicat, auxilium postulat. Is consolatus Theophilum dimittit ea tamen lege, ut nocte postera rediret præsentaneum experturus auxilium. Theophilus sequentem noctem vix expectans præ gaudio denuo Magum domi invisit. Nec mora: ab illo ad forum publicum ducitur, ubi residentem in folio dæmonem cernit augusta veste circumdatum infernalibus aulicis utrumque latus stipantibus. Interrogatur Magus a Principe, cujus generis hominem adduxisset. Ille rei seriem per ordinem narrat, contra hostes auxilium flagitat. Confessus diabolici Princeps illud polliceri non dubitat, si tamen prius Christum ejusque Matrem Virgineam non verbo tantum, sed & scripto abnegasset abdicato omni ad cælum jure. Consentit Theophilus, & sic osculis utrinque datis & acceptis solatio plenus dimittitur, triumphantur hostes, patet innocentia, officio suo restituitur. Sed (quæ Dei est gratia) postmodum facti pœnitens amarum culpam lachrymis deplorabat ope Matris Virginis receptus in gratiam, in qua usque ad sanctam mortem perseveravit. Ne de historiæ veritate quis dubitet, Eutychianum Theophili famulum testem, & de auditu & visu illius scriptorem fuisse recogitet. In hoc sane pactum cum dæmone expressum est cernere. Qui plura desiderat, Bollandistas consulat (t).

At: an diabolus sponte & ultro, an per incantationes magicas coactus apparet? Quæstioni huic, si liceat, nova quæstione respondeo: An Satanas tentans Christum in deserto sponte libera apparuit, an coactus per operationes magicas? Secundum respectu Christi non dices sine blasphemia, ergo dicendum est primum.

Sed diabolus reprobatus est spiritus & orco æternum mancipatus: bene habet; sed an talis non erat, quando Christus in deserto vivebat? Cur ergo illi apparuit? Specialiter, inquires, permittente Numine: id dico & ego; sed cur permittit in visibili specie tentari filium suum a dæmone, & cur non permittat alios tentari homines in eadem figura? Ratio nempe disparitatis est, quia per Christum fracta est potentia dæmonis. Itane vero? ergo fregit Christus potestatem diaboli, ne appareret aliis, non fregit, ne

F

appa-

---

(t) Tom. I. mensis Februarii die 4.



appareret & sibi? An Antonius, Hilarion, Theophilus, alique ante Christum fuere? id dicere nunquam licebit, & tamen fracta jam sua potestate his Viris apparuit Athanasio, Hieronymo, & Suario testibus.

Si dicas sine Manichæorum errore id Deum non posse permittere, quæro, an Evangelista Matthæus, Athanasius, Hieronymus, & alii Manichæi fuerint. Si enim repugnat divinæ Bonitati permittere, ut visibiliter dæmon appareat, mentitur & Scriptura, & Patres; si vero hac apparitione permittit duo debent defendi rerum principia bonum unum, alterum malum, & Spiritus sanctus, & Athanasius, & Hieronymus Manichæi fuere.

Verum dices: divinis utique perfectionibus repugnat, ut Deus pravis unius vetulæ desideriis moveatur, ut in creaturas a se solo conditas dæmonem grassari permittat, Argumentum non capio: ergo Christus in porcos a semetipso conditos nunquam permittere poterat, ut ingrederentur diaboli? quod tamen Evangelista teste permittum est (u). Ergo perfectionibus divinis erat contrarium, ut ad satiandam Herodis sævitiam tot infantes Deus occidi permetteret? quod permittum est tamen (x). Ergo nullum peccatum Deus potest permittere, quin suis perfectionibus deroget? Ego suaderem potius, ut illud recogitemus Apostoli (y): *O homo tu quis es, qui respondeas Deo?* Liberi arbitrii homo est, unde illum sponte & voluntarie in inferna labentem Omnipotens Dei manus non tenetur attollere. Sapientissime proin nos monet, docetque Gregorius Magnus, quod voluntas diaboli sit equidem injusta, potestas vero ipsi a Deo concessa justissima (z): *Ipse dicitur spiritus malus per nequissimam voluntatem, & idem spiritus Domini per acceptam justissimam potestatem.*

Nec Veritas tangitur, dum Deus a pravis alicujus vetulæ desideriis ad similem permissionem moveri existimatur. E principiis siquidem Theologicis tanquam certum suppono, nullam quamcunque demum creaturam divinæ voluntati posse esse motivum, quidquid enim Deus vult, volendi motivum sibimetipso est, quamvis

---

(u) Matth. 8. v. 32.

(x) Matth. 2. v. 16.

(y) Rom. 9. v. 20.

(z) Tom. 2. lib. 18. moral. c. 3.

vis propterea nequaquam inficiari intendam aliquid creatum causam posse esse moralem alicujus effectus a Deo voliti, ut merita sunt causa moralis gloriæ; non vero sunt causa decreti prædestinativi ad gloriam, ut in terminis D. A. adstruit (a): *Respondeo dicendum, quod cum prædestinatio includat voluntatem (ut supra dictum est) sic inquirenda est ratio prædestinationis, sicut inquiritur ratio divinæ voluntatis ex parte actus volendi, sed potest assignari ratio ex parte volitorum, in quantum scilicet Deus vult esse aliquid propter aliud. Nullus ergo fuit ita insanæ mentis, qui diceret merita esse causam divinæ prædestinationis ex parte actus prædestinantis. Sed hoc sub questione vertitur, utrum ex parte effectus prædestinatio habeat aliquam causam. Unde similia hinc inde permittit vel ad exercitium patientiæ, ut in Jobo a dæmone nimium quantum afflicto videmus, vel in criminum pœnam, justamque vindictam: Unanimis siquidem Theologorum doctrina est peccatum subsequens permitti in pœnam præcedentis, vel ob alios Providentiæ fines nobis incognitos.*

Non tamen propterea timendum est singulis præsertim signo Crucis munitis pieque viventibus. Post Christi siquidem passionem & mortem restricta est potestas diaboli, nec tantum sævire permittitur, quantum sævire desiderat, nec toties amplius in assumpto corpore illi apparere conceditur, quoties inter Gentiles versatus est. Nec per idololatriam amplius gentes illi datur seducere, sicut Domino nondum passo in carne seduxerat. Unde & Athanasii verba soluta sunt. Habemus ergo permittente Numine dæmonem præsentem se sistere sponte & ultro.

Sed & per incantationes magicas vocatus apparet, sic enim apparebat Theophilo. Sed, inquis, res istæ corporeæ nec allicere dæmonem queunt, nec pellere, utpote qui merus est spiritus.

Antequam ad hoc tibi respondeam, scrupulum movere conabor e libro Tobix desumptum, in quo ista narrantur (b): *Tunc dixit ei Angelus, exentera hunc piscem, & cor ejus, & fel, & jecur repone tibi, sunt enim hæc necessaria ad medicamenta utiliter, quod, cum fecisset, assavit carnes ejus, & secum tulerunt in via, cætera salierunt, quæ sufficerent eis, quousque pervenirent in Rages civitatem Medorum.*

F 2

Tunc

---

(a) D. A. 1. p. quæst. 23. A. 5. in ☉. (b) C. 6.



*Tunc interrogavit Tobias Angelum, & dixit ei: obsecro te Azaria frater, ut dicas mihi, quod remedium habebunt ista, quæ de pisce servari iussisti? & respondens Angelus dixit ei: cordis ejus particulam, si super carbones ponas, fumus ejus extricat omne genus dæmoniorum sive a Viro, sive a Muliere, ita ut ultra non accedat ad eos. Fumus hic erat corporeus, & tamen fugare dæmonem poterat, quod & factum est, nam ita inferius pergit sacer Historicus (c): Recordatus itaque Tobias sermonum Angeli protulit de cassidili suo partem jecoris, posuitque eam super carbones vivos, tunc Raphael Angelus apprehendit dæmonium, & relegavit illud in deserto superioris Thebaidis.*

Sed, inquires, hæc omnia non contingere virtute rei corporeæ, sed Deus tantummodo fumum hunc pro signo elegit, quo posito Archangelus Raphael abigeret dæmonem. Non abnuo: cur autem non & mihi liceat dicere: similia verba, vel incantationes magicas signa esse statuta a dæmone, quibus positis sponte ultroque appareat: repetenda sunt mihi verba Magni Aurelii jam superius copiose adducta: *Illiciuntur autem dæmones ad inhabitandum per creaturas, quas non ipsi, sed Deus condidit, delectabilibus pro sua diversitate diversis non ut animalia cibus, sed ut spiritus signis.* Quid si dicerem, quod sicut hoc posito fumo Archangelus Raphael religavit dæmonium, ita pariter positis incantationibus magicis dæmon superior inferiorem ad præsentiam cogat? Quamvis enim inter Angelos reprobos vera Hierarchia non sit, illorum regimen tamen ex imperantibus & obedientibus constat. Quid si dicerem, quod sicut fumus Tobiae non naturali, sed divina virtute fugavit dæmonem, ita Amuleta non sua, sed virtute Ecclesiæ diabolos abigant, illa præsertim, quæ iis componuntur ex rebus, quæ specialiter ab Ecclesia benedicuntur? Unde Amuleta omnia nequaquam contemnenda esse existimo.

Inter spiritum & corpus proportionem non esse verissimum est, sed quid inde infertur? An fors propterea spiritus non agat in corpus? minime; nam certe anima mea spiritus est, & tamen continuo & quidem suo pro libitu ad varias actiones corpus determinat. Certe diabolus, cujus in libro Tobiae fit mentio, spiritus erat,

---

(c) C. 8.

erat, & tamen septem maritos Saræ occidit (d). Imo & corpus agit in spiritum; ignis siquidem infernalis corporeus est, & tamen dæmones torquet, qui meri sunt spiritus: ergo & spiritus agunt in corpora, & in spiritus corpora. Si quæras: quomodo? ignorare me fateor, fors optima est Augustini responsio his omnibus applicanda, quam ille de solo infernali igne intelligit, quod ignis corporeus torqueat dæmones *veris, sed miris modis*.

Illud vero prorsus non capio, quod dicant dæmoni infirmo & in inferis captivo spiritui omnem fuisse potestatem ademtam. An ergo existimant dæmones omnes esse clausos in inferis? Id si est, cur ergo nos sæpissime monet Apostolus, ut caveamus, ne in tentationem incidamus, & in laqueum diaboli? Si in inferno detinetur hic spiritus, quæso, qua tuba stentorea indigebit, ut tentare nos possit? Si in inferno ligatus est, cur clamat Petrus Apostolus (e): *Sobrii estote & vigilate, quia adversarius vester diabolus, tanquam leo rugiens circuit, quærens quem devoret?* Cur ad luctam difficilem nos animat Paulus dicens: *Non est nobis colluctatio adversus carnem & sanguinem, sed adversus Principes & Potestates, adversus mundi rectores tenebrarum harum contra spiritualia nequitiae in caelestibus?* Ergo a primo ad ultimum non repugnat in assumpto corpore apparere diabolum, nec repugnat hominem cum diabolo expresse pacisci.

Jam juvat ad tacitum cum dæmone pactum descendere. Pactum hoc in eo consistit, ut dæmone etiam visibiliter non appARENTE per hujus vel alterius rei usum mira patrentur. Sed neque hoc, inquiunt, posse subsistere: vel enim res ipsæ, quibus utimur, ex natura sua sunt proportionatæ effectibus, & vires habent ad illos producendos idoneas? & sic diabolicum pactum per se evanescit, vel vires non habent huic effectui pares? & est apertum miraculum, cum solius Dei sit rerum mutare essentias, ac naturas invertere.

Hoc argumentum, quamvis æstimetur a multis, mihi tamen demonstrativum non est. Ajo siquidem, res, quibus homines superstitiosi utuntur, ex natura sua effectui proportionatas non esse, quamvis asseram, quod, quamprimum etiam dubitari prudenter

F 3

potest,

(d) C. 6.

(e) 1. Petr. 5.



potest, an effectus naturæ viribus possit adscribi, etiamsi nobis videatur mirabilis, tribuendus naturæ sit. Non tamen per hoc pactum diabolicum tollitur. Si enim inter omnes Philosophos convenit, ac rerum expertos medium aliquod cum rei eventu naturalem connexionem habere non posse, ex altera vero parte e Scriptura & SS. Patribus constat Deum nil simile unquam revelasse; & si variæ cæremoniæ insuper adhibeantur, & eventus tamen interea secutus sit; amabo, cuinam id alteri, quam diabolo tribuas? Liceat mihi exemplum ponere in Virgula divinatoria: scio hanc & inveniendis aquis, & detegendis argenti fodinis esse aptissimam, & a Viris in hac re expertissimis & jure quidem merito adhiberi. Sed an ad detegendos fures, homicidas, aliosque hujus fursuris homines eodem etiam modo applicari potest? non puto, & tamen mihi libellus est, ubi integra narratur historia, quod hujus Virgulæ ope terra marique homicidas sint infecuti, imo & affecuti. Explicet mihi hoc quispiam naturaliter, explicari si valeat. Hoc tamen hac in parte lubenter dandum existimo a Confessariis nonnullis in Physica minus expertis plura superstitionibus tribui, quæ tamen naturæ vires nequaquam excedunt.

Plus difficultatis alterum patitur, an nempe sagæ vel lamæ physice ad suos saltus transferantur a dæmone. Antequam ad ista respondeam, lectorem benevolum præmonitum velim, me nequaquam ejus esse sententiæ, ut omnes historias, quæ de similibus circumferuntur, velim esse de fide, imo ultronee fateor millenis deceptionibus rem esse obnoxiam. Imo cum modernorum systema sit mulieres hujusmodi sine vero miraculo a dæmone ne quidem posse transferri, optime meo perfungar officio, si duntaxat ostendero translationem hanc diabolicas vires nequaquam transcendere.

Audiamus ergo, quæ in contrarium sapiant: inprimis unguentum, quo certas corporis partes ungere solent, ut transferantur ad saltus, ajunt ex meris speciebus esse compositum, quæ somnum concilient. Adducunt nonnullas historias, e quibus certum omnino est mulieres ejusmodi vel in lecto vel prope fenestram fuisse inventas, ubi tamen putabant se alio translatas fuisse.

Jam hæc, si bene attendas lector benevole, ad summum pro-

probant mulieres has non transferri ad saltum, non vero probant transferri non posse. Dein nullus hucusque dixerit, unguentum, cujuscunque demum naturæ sit, ejus efficaciam esse, ut illius ope corpus de loco transferatur ad locum. Dici tamen fors posset unguentum hoc meram esse conditionem statutam a dæmone, qua posita ille scēminam, vel marem transferat de loco ad locum. Quod unguentum hoc e rebus soporiferis componatur, non abnuo, id tamen est, quod minus intelligo, quomodo tam celeriter, & quasi in ictu oculi somnum conciliet. Medicus ego non sum, sed tamen difficile autumo in tota medicina potum posse componi, qui illico somnum conciliet. Dein quid ad conciliandum somnum & quidem instantanes faciat sanguis puerorum, quos nondum sacra baptismatis unda abluit? an sanguis istorum facilius somnum conciliet, quam sanguis jam baptizati infantis? cur hic sanguis majori in copia adhiberi jubetur? an non sufficerent reliquæ species, quas natura ipsa conciliando somno aptavit?

De historiis mirum est, mentionem quod faciant, cur enim ego alique sententiæ meæ Patroni istis historiis numero paucis fidem adhibeam, ubi Adversarii nostri contrariis numero multo majoribus per Judices & profanos & sacros centies confirmatis fidem simpliciter denegant? Imo si ex historiis lubeat argumenta depromere, de transactione cum Adversariis omnino justissima non desperarem. Eja ad rem. Illi dicunt mulieres sæpius in lecto vel prope fenestram fuisse inventas altissimo somno oppressas, ubi putabant se nescio quo translatas fuisse. Pace mea hæc vera sint; qui autem partem tuentur contrariam alias easque innumeras historias afferunt, quod similes lamia reipsa & physice & quidem per maxima spatia fuerint translatae a dæmone. Stabiliunt hoc innumeris Virorum omni exceptione majorum testimoniis, adducunt testes tam de visu. quam de auditu. Jam his omnem prorsus fidem negare videtur satis difficile, ne quid aliud dicam. Quid ergo exinde sequitur? Hoc scilicet puto legitime posse inferri mulieres has execrabiles subinde illudi a dæmone, ut putent se esse, ubi non sunt, dum in lecto altissime dormiunt, subin vero physice transferri ad saltus, sic enim testibus in utramque partem contrariis honos est.

Ast



Ast id dici nequaquam potest, obstat enim Jus sacrum C. 26. quæst. 5. cap. 12. expresse præcipiens, ut Sacerdotes omni diligentia populum instruant falsa esse hæc omnia, & non a divino, sed maligno spiritu hæc phantasmata originem trahere, vi cujus sceleratæ mulieres existiment se cum Diana paganorum Dea aut Herodiade super varias bestias equitare, & nocturno tempore multa terrarum spatia pertransire. Ex mente igitur ipsius Ecclesiæ falsum est scæminas physice transferri a dæmone.

Hic Adversariorum Achilles est, qui, ut sterneretur, ad varia oportet attendi; ac imprimis quidem hic textus ad summum actuale translationem negat, possibilitatem non negat; ego vero potissimum possibilitati inhæreo. Dein an huic Capitulo quidquam deferendum sit, lectoris judicio relinquendum existimo, ex decreto siquidem Gratiani desumptum est, quod sane juxta modernam crisin autoritatibus apocryphis plenum est. Sane si omnia in decreto Gratiani contenta genuina essent, veraque, majori certe cum reverentia de Romano Pontifice nonnulli loquerentur, & scriberent. Dein quod hoc Capitulum mihi magis suspectum reddit, illud est, quod nonnulli ex Concilio Ancyrano, nonnulli ex Acquirensi desumptum velint. Apud Binium (*f*) equidem in Concilio Ancyrano inveni, sed in delectu Actorum universalis Ecclesiæ (*g*) nec jota deprehendere potui; unde datur intelligi Canonem hunc Concilio fuisse suppositum. De Concilio vero Acquirensi omnino nihil inveni. Ne vero difficultatem fugere videar, dicendum omnino est sceleratis hisce mulieribus, quarum in præfato Canone mentio fit, illudi a dæmone, non enim possunt cum Diana vel Herodiade de nocte vagari, cum utraque in inferno existens ad æternas damnata sit tenebras, nec possunt super veras bestias tanta celeritate tot locorum spatia pertransire, non enim naturales bestiarum vires sufficerent. Illuduntur etiam a dæmone, dum Dianæ vel Herodiadi quidquam credunt divinitatis inesse. Sed an propterea luduntur & aliæ, quæ equidem sciunt dæmonem non Deum, sed Dei hostem existere? quæ sciunt non vero se animanti insidere, sed dæmoni in corpore assumpto apparenti? Non ergo Canon translationem physicam

---

(*f*) Tom. 1. part. 1.

(*g*) Edit. Lugdun. anno 1707.

ficam negat, sed quam illæ mulieres prætendebant, phantasticam asserit.

Verum hæc translatio physica legibus est naturæ contraria, corpus hominis etenim ad minus ducenties gravitatem aeris superat, unde vel humano corpori adimi gravitatem oportet, vel gravitatem aeris secundum proportionem augeri, utrumque autem sine manifesto miraculo fieri non potest. Hujus vero capax dæmon non est. Jam dixi, si de modo interroges, quo ista contingant, ignorare me fateor; sed nec mea, nec aliorum ignorantia rei potest impedire substantiam. Corpus meum grave est, scio, sed simul exerior præcise, quod anima mea, quæ merus est spiritus, corpus meum ad varios motus sursum & deorsum determinet. Sæpe anima corpus ad altissimi montis ascensum determinat. Jam liceat quærere, an anima hoc in casu adimat gravitatem, an vero gravitatem aeris augeat? quod mihi responsum fuerit, dæmoni applicari fors poterit. Jam si hoc potest hominis anima, cur non possit diabolus? an infirmiores illum putamus, de quo tamen Jobus non dubitabat scribere, quod nulla sit in terra potestas, quæ illius possit æquiparari potentiæ? Certe propria experientia didici, quod adhucdum puer lapidem aere multo graviorem ad magnam projece- rim altitudinem, imo e machinis bellicis constat, quod globus plum- beus humano sæpe corpore gravior ad stupendam omnino, & vix hominibus visibilem altitudinem attollatur ope pulveris pyrii; cur ergo negandum id dæmoni? Si Scripturam velimus consulere, hu- jusmodi translationis exempla non desunt. Habacuc siquidem Pro- phetam ad Danielelem in leonum carcere clausum Angelus transtu- lit (*h*), imo & in novo Testamento Philippum Diaconum spiritus Domini Azotum rapuit (*i*).

Sed dices: hoc a bonis Angelis factum est. Quid postea? permittente Numine idem naturaliter possunt mali, quod boni. Nam post peccatum (ut communis fert Theologorum sententia) naturalia in Angelis integra permanferunt.

Sed dices in utroque casu intervenisse miraculum. Ex par- te non repugno, in hoc erat miraculum, quod Deus ad Danielelem

G

hoc

(*h*) Daniel. 14.

(*i*) Act. 8. v. 39. & 40.



hoc modo prandium miserit omnino ipsi, totique naturæ indebitum, idem de Philippo dicendum est; non enim debebatur Azotiis, ut ipsis & quidem tanta celeritate lux evangelica per Philippum claresceret. Si vero ipsam translationem spectes, miraculosa non erat utpote viribus Angeli commensurata. Ut veritatem hanc melius capias, ad Evangelium Marci progredior (*k*), in quo maligni spiritus duo porcorum millia in mare egisse scribuntur, ergo possunt dæmones corpus de loco transferre in locum. Res omnino clarescit in ipso corpore Salvatoris, de hoc enim scribit Matthæus (*l*), quod assumpserit ipsum diabolus, & statuerit super pinnaculum templi. Postea vero in montem excelsum valde transtulerit.

Dices forsan: id phantastice contigisse, sed quæso, quid juris diabolo in phantasiam interiorem Christi?

Inquies ulterius: non rapiendo per aera, sed pedibus ambulando id factum esse. Ast repugnat Scriptura dicens: *Assumpsit eum diabolus, & statuit super pinnaculum templi*. Si ambo pedibus incessissent, quomodo dici posset, quod diabolus eum supra pinnaculum templi *statuerit*: nonne statuisset semetipsum? Enimvero physicam hanc translationem fuisse supponit ex S. Chrysostomo S. Thomas (*m*): *Dicendum, quod sicut Chrysostomus dicit, forsitan diabolus quantum ad se, sic Christum assumebat in pinnaculum templi, ut ab omnibus videretur, ipse autem nesciente diabolo sic agebat, ut a nemine videretur*. Id pariter supponit Gregorius Magnus (*n*): omnino dicens id mirandum non esse, quod Christus a diabolo in pinnaculo templi statutus sit, qui a diaboli membris se crucifigi permisit. Possibile ergo est, ut diabolus lamias de loco ad locum transferat, quamvis, quo modo id fiat, procul dubio nesciamus.

Transeamus ad fulmina, ventos, & grandines, quæ naturæ phænomena ope magica oriri posse Adversarii negant. Sic enim naturæ opera mulieris cujusdam subjiceremus malitiæ, & Deus naturæ leges infringeret, ut pessima mulier vindictam possit exercere in proximum. Sane naturales hos esse effectus a vaporibus terræ exortos, quos adscribere dæmoni ridiculum esset. Hoc agnoscere

---

(*k*) C. 5.

(*l*) C. 4.

(*m*) 3. p. quæst. 41. A. 4. ad 7.

(*n*) Tom. 3. hom. 16. in Evang.

scere Ecclesiam ipsam, quæ, quamvis oret pro avertendis fulminibus, nullam tamen sagarum ingerit mentionem.

Hoc argumentum non ejus mihi roboris est, cujus forsan Adversarii autumant. Nec meum est multis defendere, an similia actu ope dæmonis fiant, sed tantum fieri an possint. Antequam vero respondeam, sit mihi licitum quærere, an Deus naturæ opera subjecerit dæmoni, an naturæ leges infregerit, quando diabolo in Jobi bona & liberos sæviendi potestatem concessit? Sacer textus sic habet (o): *Ignis Dei cecidit e calo, & tactas oves, puerosque consumpsit, repente ventus vehemens irruit a regione deserti, & concussit quatuor Angulos domus, quæ corruens oppressit liberos tuos & mortui sunt.* Quid ergo ad ista? si ad satiandam malitiam dæmonis, seu potius ad tentationem justī Deus ista permisit, cur ad peccatorum vindictam non possit permittere? Recogita, quæ ex Magno Gregorio supra adduxi: injusta siquidem & pessima & sagæ & dæmonis id cupientis voluntas est, sed justissima est potestas permittentis id Numinis. Nec curiosus indaga, cur id Deus permittat, nam nemo Consiliarius ejus fuit.

Profecto Angelorum malorum potestas etiam e Psalmis elucet, ubi ita Propheta regius (p): *Misit in eos iram indignationis suæ, indignationem & iram, & tribulationem immisiones per Angelos malos:* ubi notandum est, quod idem Psalmista antecedentibus versibus etiam grandinis mentionem injecerit (q): *Et occidit in grandine vineas eorum, & moros eorum in pruina, & tradidit grandini jumenta eorum, & possessionem eorum igni.* In quæ verba aptissime Augustinus (r): *Immitti per eos (nempe dæmones) immisionem super quoslibet a Domino Deo, quos hac pena judicat dignos, durum videtur eis, qui minus idonei sunt cogitare, quemadmodum summa Dei justitia bene utatur & malis - - Utitur ergo Deus Angelis malis non solum ad puniendos malos, sicut in istis omnibus, de quibus loquitur Psalmus, sicut in Rege Achab, quem fallaciæ spiritus ex Dei voluntate seduxit, ut caderet in bello; verum etiam ad probandos & manifestandos justos, sicut fecit in Job.* Quod autem pertinet ad istam materiam corporalem visibilium

G 2

bilium

(o) Job. 1. v. 16. &amp; 19.

(q) v. 47. &amp; 48.

(p) Psal. 77. v. 49.

(r) Tom. 8. in Psalm. 76.



*bilium elementorum, puto, quod ea possint uti Angeli boni & mali, quantum cuique potestas est. - - - In libro autem fidelissimo legimus diabolum potuisse etiam de calo ignem immittere ad sancti Viri tantum pecorum numerum mirabili & horrendo impetu consummendum, quod diabolo tribuere nemo fidelium fortassis auderet, nisi sanctæ Scripturæ autoritate legeretur. Potuit ergo Augustino imo Scriptura teste permittente id Numine immissa diabolus grandine vastare vineas, occidere pecora, & cur id modo non possit? an forte non amplius iusti sunt, quos Deus probet? nec mali sunt, quos puniat vindex? Hoc equidem certum est verba vel signa magica excitare tempestates non posse, sed hæc tantummodo signa sunt, quibus positus diabolus suam, quam Deus permittit, potestatem exerceat.*

At grando, fulmen, fulgur effectus naturæ sunt: quid tum? an Ægyptiorum grando naturalis non erat? si talis non erat, quomodo immissa a dæmone, qui supra naturam operari non potest? Quid, quæso, magis naturale, quam pluvia? & tamen ingruente siccitate etiam processiones publicæ instituuntur, ut pro pluviis Deo supplicemus. Imo cum effectus hi naturales sint, eo facilius se ad illos dæmonis potestas extendit, qui totum hoc universum etiam supercomprehendit. Si quæras denuo, qua ratione id fieri possit, cum eodem Augustino respondeo (s): *Claret igitur ista hominibus fieri per bonos & malos Angelos posse, quid aut quando fieri oporteat, me latet; illum vero, qui facit, non latet, & cui voluerit revelare.*

Ecclesia vero in suis precibus pro avertendis tempestatibus equidem sagarum non meminit, utpote quæ viribus suis nocere non possunt, meminit tamen diaboli, cujus ope nocere intendunt: in rituali siquidem Romano jussu Pauli quinti edito ista invenio (t): *Nihil proficiat inimicus in nobis, & filius iniquitatis non apponat nocere nobis.* Quis est inimicus iste, quis filius iniquitatis nisi diabolus? Dein secunda oratio contra tempestates est ista: *A domo tua, quæsumus Domine, spirituales nequitia repellantur, & aerearum discedat malignitas tempestatum.* Non ergo censet Ecclesia tempestates non posse oriri a dæmone.

Quod Adversarii simplicem populum carpant, quod quoscunque

---

(s) l. f. c.

(t) Pag. 297.

cunque casus adversos five in jumentis, five in hominibus diaboli ministerio tribuant, lubens adstipulor, servandam enim sine dubio regulam Theologorum existimo, quod quamdiu effectus quispiam naturæ potest adscribi, quamvis explicari modus pro certo non possit, naturæ tribui debeat; hinc paralyfin, febres, deliria, aliosque morbos, quos Medici naturales esse conjeçant, nequaquam arti diabolicæ tribuo, si tamen & Viri prudentes, & in medica arte periti post maturam deliberationem clare edisserant hos effectus vires naturæ transcendere, nullus dubito, quin id Magiæ possit adscribi. Certe e Scriptura didicimus, quod Angeli mali hominibus possint morbos immittere, sic dæmon Jobum percussit ulcere pessimo (u): ex eadem Scriptura habemus, quod permittente Numine in jumenta desæviant. Idem Ecclesiastica testatur historia in actis Cypriani & Justinæ Martyrum (x) supra adductis. Id etiam affirmat Hieronymus in vita Hilarionis Abbatis, in qua etiam Camelum invenies misere agitatum a dæmone.

Nec dicas quoscunque Viros etiam Medicos præjudiciis fascinosos esse. Nam certe injuriam inferis tot Viris omni exceptione majoribus: Authores enim, qui omnia maleficia negant in comparatione illorum, qui adstruunt, paucissimi sunt, modicissimi que. Unde in his & similibus casibus ad spiritualia remedia posse recurri non ambigo, quamvis enim ipse optarem, ut Sacerdotes toties repetitis benedictionibus parcerent, ne sacræ hæ preces in casu tantum necessitatis adhibendæ propter frequentiam coram plebe vilescant, simpliciter tamen eliminandas non autumo.

Quod vero ipsa Ecclesia nullum agnoscere maleficium velit, nullasque preces præscribat, non videtur omnino veritati conforme. Si enim vel Jus Canonicum, vel Theologiam moralem inspicias, invenies impotentiam exercendi copulam conjugalem etiam ex maleficio ortam, si perennis sit, impedimentum esse matrimonium dirimens; hinc in eodem Rituali Romano benedictionem thalami legimus (y). In benedictione falis ita orat Ecclesia (z): *Exorcizo te creatura falis per Deum verum - - - ut effugiat, atque discedat*

G 3

fcedat

(u) C. 2.

(x) C. 1. &amp; Psalm. 77.

(y) Pag. 231.

(z) Pag. 225.



*secedat a loco, in quo aspersum fueris, omnis phantasia & nequitia vel versutia diabolicæ fraudis, omnisque spiritus immundus adjuratus per eum, qui venturus est judicare vivos & mortuos, & sæculum per ignem. In benedictione aquæ sic habet (a): Exorcizo te creatura aquæ, ut fias aqua exorcizata ad effugandam omnem potestatem inimici, & ipsum inimicum eradicare & explantare valeas cum Angelis suis apostaticis. In oratione subsequa orat Deum, ut creatura tua misteriis tuis serviens ad abigendos dæmones, morbosque pellendos divinæ gratiæ sumat effectum, ut quidquid in domibus, vel in locis fidelium hæc unda resperferit, careat omni immunditia, liberetur a noxa. Non hic resideat spiritus pestilens, non aura corrumpens discedant omnes insidiæ latentis inimici &c.*

Restat adhuc unicum, quod ope magica fieri posse Adversarii negant, nempe omnino impossibile credunt, ut saga per incantationes suas dæmonem in corpus proximi intrare compellat. Vel enim id permittente Numine fieret, & Deus ad magicas artes cooperaretur, vel Deus ad voluntatem impiam sagæ dæmoni intrandi hoc corpus potestatem concederet? & sic divinæ permissiones pravis sagarum affectibus subjacerent.

Sed non est, ut divinis quidquam perfectionibus timeamus, e Scriptura siquidem clarescit hominem ea subin præditum esse potentia, ut dæmoni in corpus alterius potestatem concedat, sic Paulus incestuosum illum Corinthium tradidit Satanae in interitum carnis (b), hoc est, inquit Theophylactus (c), ut morbo eum maceret, & tabescere faciat - - metam autem diabolo statuit, aque atque in divo Jobo, ut corpus tantum, non autem animam attingat. Idem Apostolus Hymenæum & Alexandrum in fide passos naufragium dæmoni subdidit (d), hoc autem a Paulo factum esse idem Theophylactus existimat (e): *Ut cum vehementia & atrocitate penæ major sit contumelia, atque ut ostendat se Satanae imperare, ut ex eo majorem eis terrorem & metum incutiat.* Pro aliis vero, quos non ut Apostolum Dei Spiritus armat, sed Princeps tenebrarum gubernat, solícite caveas velim, ne unquam existimes sine permissione divina fieri quid

(a) Pag. 226.

(b) 1. Cor. 5.

(c) in 1. Cor. 5.

(d) 1. Tim. 1.

(e) in 1. ad Tim. 1.

quid posse. Mentem pariter pondera Magni Gregorii supra adductam, quod quidem injusta sit dæmonis, sagæque voluntas, justissima tamen potestas concessa a Domino. Jam ut diabolus in humano corpore habitet, sæpe disponente fieri Numine potest ad probationem justorum, sæpe puniente Numine, ut spiritus nequam exagitaverat Saulem, sæpe etiam permittente Numine sive ad probationem justī, sive pœnam injusti per magicas incantationes, non quasi per illas dæmon coactus existeret, sed quia lubenter in humano corpore habitat, ut ex Evangelio Marci discimus (f), ubi maligni spiritus in gregem porcorum immitti petebant, cum expellerentur ab homine. Neque propterea Deus artis magicæ cooperator existit, cum ingressum hunc dæmonis non teneatur avertere. Certe peccata hominis omnia Deus modo facillimo impedire posset; cum vero nequaquam impediatur, an propterea cooperator existet? Concurrit equidem Deus, sed physice, non moraliter, non imputabiliter, nec propterea divina decreta pravis desideris sagæ existimes subdita, non enim ad id permittendum a voluntate sagæ Deus movetur, sed a seipso a sua scilicet vel Providentia vel Justitia.

Nec hujusmodi casus in Ecclesia defuere: Baronius siquidem de Simone Mago ex Anastasio Nicæno narrat sequentia (g): *Multos tentantes eum dicere præstigiatores, cum eos esset allocutus, & inde convivii prætextu bovem sacrificasset, & convivio excepisset, variis morbis, & dæmonibus subjecit.* Clarius exemplum ex Hieronymo supra adduxi, de Virgine scilicet, in quam amoris philtro dæmon intrusus est. Imo id fieri posse supponit Ecclesia, ita enim in Rituali Romano jam sæpe citato exorcista instruitur (h): *Subeat dæmonem dicere, an detineatur in illo corpore ob aliquam operam magicam, aut malefica signa, vel instrumenta, quæ, si obsessus ore sumpserit, evomat, vel si alibi extra corpus fuerint, ea revelet, & inventa comburantur.*

Adducunt denique ex Bodino historiam, vi cuius Paulus hujus nominis quartus Judæos omnes Roma exules voluit, eoquod ex energumenorum corporibus responderint dæmones se a Judæis fuisse

(f) C. 5.

(g) ad annum Christi 68.

(h) Pag. 319.



fuisse intrusos. Differente autem Religioso quodam, id per hominem fieri non posse, mutavit sententiam, nec Judæos civitate ejecit. Crediderim facile id a Paulo 4to statutum fuisse, non tamen ob Religiosi hujus Dissertationem, sed quia summo Pontifici aliunde constabat dæmonem patrem esse mendacii, fideque indignum. Finitam hoc modo existimaveram primam partem Dissertationis meæ, cum ecce! amica manus decretum *Augustissimæ Imperatricis nostræ Mariæ Theresiæ* 5. Novembris anno 1766. emanatum mihi obtulit, quod non parum confirmat Magiæ diabolicæ possibilitatem.

Postquam enim §. 3. dictum est plebem antea actis retro temporibus ob simplicitatem suam plurima dæmoni tribuisse, quæ omnium maxime naturalia sunt, postquam simul docetur similia opera, quæ aliquibus mira apparent, vel ex simulatione, dolo & fraude, vel etiam ex mania & melancholia, vel alio morbo procedere, postquam alii homines adducuntur, qui se quidem cum corpore & anima diabolo devovent, absque tamen eo, quod similia mirabilia faciant, jubet §. 4. attendere ad facta, si illa vires revera humanas transcendant, judicandum esse ope dæmonis fieri. Quodsi inferiores Judices revera existiment Magiam veram adesse, omnia acta, totumque processum ad Judicem superiorem jubentur devolvere. Qui vero de tali Magia suspectus est, interrogari jubetur, quomodo & cujus auxilio similia opera humanis majoris patraverit. Pœnam vero in similes personas pacto quodam diabolo obstrictas ob rei gravitatem *Augustissima* sibimetipsi reservat. Ergo supponit saltem similes casus esse possibiles. Ego vero claudio primam Dissertationis partem S. Epiphanii verbis prope initium ita loquentis (i): *Atque hæc partim ex libris veterum Scriptorum, partim ex auditu hominum, qui menti nostræ exactam fidem fecerunt, novimus.*

Animad-

---

(i) contra Hæres.

## Animadversio.

Cum Art. 6. de lapsu Simonis Magi scriberem, autoritate eruditissimi Historici Fleurii nitebar, sed confecto jam meo opusculo per accidens in eminentissimi Cardinalis Gotti opera incidebam, cujus verba nimium proposito meo faventia non possum non adducere: „De Simonis Magi conatu & præcipiti lapsu „ veteres omnes conveniunt, in circumstantiis autem dissident. „ Author Constitut. S. Clementis nomine dicit hæc accidisse in „ theatro lib. 6. c. 9. ibique Petrum jussu adeste, qui seorsum „ orabat Deum, ut Simonis conatum everteret: “ *Cumque hæc dicerem (in persona Petri loquitur) desertus a virtutibus Simon cum magno fragore corruit, vehementerque concussus fregit coxendicem, & pedum talos &c.* „ Sed ne dicat aliquis libros Constit. Clem. apocryphos „ esse, accedant alii veteres. Arnobius adversus Gentiles scribens lib. 2. inter causas, ob quas Romanorum multi patriis relictis erroribus veritati Christianæ adhæserunt, hanc ponit: “ *Viderant enim, inquit, cursum Simonis Magi, & quadrigas igneas Petri ore difflatas, & nominato Christo evanuisse. Viderant, inquam, fidem Diis falsis, & ab iisdem metuentibus proditum pondere præcipitatum suo cruribus jacuisse præfractis.* Post deinde perlatus Brundam cruciatibus & pudore defessum ex altissimi culminis se rursus præcipitasse fastigio. „ Hæc facta non in angulo, sed Romæ & tanto spectante populo, non objecisset gentibus Arnobius, si explorata non fuissent. „ S. Augustinus lib. de hæres. c. 1. idem confirmans ait: *In qua urbe (Roma) Apostolus Petrus eum (Simonem) vera virtute Dei omnipotentis extinxit.* „ Theodoritus hæret. fabul. lib. 1. c. 1: *Rursus, inquit, Romam veniens divinus Petrus fraudis eum (Simonem) pennis nudavit. Qui, cum eum tandem in miraculorum certamen provocasset, omnibus Romanis videntibus eum ex magna altitudine deturbavit, cum orasset, & qui miraculum viderant, eos cepit ad salutem.* „ Idem „ Isidorus Pelusiota lib. 1. epist. 13. ad Lampetium. S. Ambrosius quoque ferm. 66. in nat. Apost. hoc factum describens ait: *Cum enim idem Simon se Christum diceret; & tanquam filium ad Patrem assereret volando se posse conscendere, atque elatus subito magicis artibus*

H

volare



*volare cepisset: tunc Petrus fixis genibus precatus est Dominum, & præcatione facta vicit magicam levitatem - - tunc igitur Petrus velut vinctum illum de sublimi aere deposuit, & quodam præcipitio in saxa illident ejus crura confregit, & hoc in opprobrium facti illius, ut, qui paulò ante volare tentaverat, subito ambulare non posset, & qui pennas assumerat plantas amitteret &c.*

„ S. Cyrillus Hierosolymitanus Catech. 6. Sulpitius Severus lib. 2. hist. sac. & alii idem narrant solum in hoc diversi, quod isti Simonis lapsum tribuunt Petri & Pauli precibus, quibus consentire videtur Ambrosius supra relatus, & Maximus Taurinensis hom. 5. in nat. Apost. qui hanc fuisse causam, quareambo martyrium perpeffi sint, affirmant; alii vero, ut Arnobius, Augustinus, & alii triumphum de Simone Mago soli Petro tribuunt.

„ Quia vero non in hac sola circumstantia diversimode Simonis lapsus narratur aliquibus volentibus ad solius Petri preces, aliis etiam ad preces Pauli evenisse, sed etiam in aliis: tum in tempore: quidam enim videntur velle Simonis interitum in primo Petri adventu Romam & sub Claudio contigisse, quidam & plures in secundo adventu & sub Nerone; tum circa modum lapsus: alii enim volunt Simonem tantum crura fregisse, alii toto corpore confractum cecidisse, alii ad pedes Neronis eum corruisse, alii delatum Brundam desperatione e sublimi conclavi præcipitem se dedisse, Brundam autem volunt fuisse locum quendam Romæ sic dictum: alii de hoc nihil dicunt: alii precibus solis hanc victoriam reportatam ferunt: alii jejunium adjungunt, ut statim dicam. Demum totam historiam suspectam quidam habent ex silentio Justini, Irenæi, Tertulliani, & Eusebii de illa.

„ Propterea quidam Critici rigidiores maxime ex Protestantibus, inter quos Ittigius de hæresiarchis sect. 1. c. 2. totam narrationem suspectam putant. Verum si diversitas in circumstantiis, quibus aliquod factum antiquum a diversis narratur, sufficit ad reddendum factum illud vel fictum, vel saltem suspectum, cum in historiis fere nullum narretur factum, in quo Historici in aliquibus circumstantiis ut temporis & loci varii non sint, fieret,

„ ut

„ ut nullum factum quoad substantiam certum esset habendum. Varietas ergo hæc in circumstantiis de lapsu Simonis Magi ad summum potest quidem dubias relinquere circumstantias, sed substantiam facti lædere non potest. Quodsi contendant adhuc totum esse commentitium & fictum, liberrime dicam: donec ipsi non afferant claram & invictam probationem de hujus facti falsitate, me potius eligere decipi cum Arnobio, Cyrillo Hierosolymitano, Ambrosio, Augustino, Theodorito, Isidoro Pelusiota, & aliis pluribus, quam hos præcipuos veteres Ecclesiæ magistros levis credulitatis accusare, ut cum paucis Recentioribus sapiam (k).“ Nemo proin & me levitatis accuset, si cum purpurato hoc Patre ejusdem sim mentis & animi.

Subjungo breviter Crispin Natalis Alexandri Viri certe non nimis creduli (l): *Tam illustrium testium suffragiis firmatam veritatem in dubium revocare temerarium est.*



(k) De verit. Relig. Christ. Tract. 6. c. 1. de S. Petro §. 13.

(l) Tom. 4. Sæc. 1. Dissert. 13. propos. 1.





ro ad Ægyptiorum fervarentur delicias. Post multos miseræ servitutis annos evenit, ut futurus populi Salvator nasceretur in lucem. Moses siquidem Amrami & Jochabedæ filius primos in Ægypto natales sortitus est. Mater elegantissima filioli facie delectata tribus eum mensibus omnino abscondit Ægyptiorum furori, quantum poterat, subtractura. Ast illis hoc factum subodorantibus celare amplius infantem non poterat. Crudeli igitur Regis obeditura imperio fiscellam scirpeam contexuit pice ac bitumine oblitam, in eaque tacta dolore cordis intrinsecus & multis lachrymis diffluens miserum ponebat infantem, & ad caretam fluminis ripæ deferebat certo certius interituum.

Enimvero quis mortalium hujus vitam speraret infantis? in momenta singula minabantur fluctus, ut eum in profundum detruderent. In terra hostili & externa nullus erat, qui vel posset, vel etiam vellet esse subsidio. Israelitæ nequaquam audebant, ne semetipsos in propriæ vitæ discrimen conjicerent, Ægyptii omni tigris ferociore renuebant invisæ genti ferre auxilium. Sed ecce! desperatis jam omnibus adest auxiliator Deus, qui innocentiam premi quidem, non tamen opprimi finit. Contigit, ut ad fluminis ripam Pharaonis filia deambulare lavandi corporis gratia. Hæc (ut Principem regiam vel maxime decebat) puellis nobilibus stipata forte fortuna, seu potius disponente sic Numine fiscellam illam conspexerat. Eventus totius inscia illam ad se deferri mandat. Et en! cum illa referaretur, vagientem in ea pusionem conspicit. Igitur illico decreti regii recordata eum de Hebræis esse cognovit. Concussere Principis animum & ætas tenera, & elegantia formæ. Soror infantis commoto pectore eventum rei expectans accedit ad Principem rogans, an obstetricem fortasse hebraicam adhibere vellet infanti, annuit illa, & ecce! mirabilem Providentiæ divinæ lusum! puella matrem infantis propriam advocat, illi puer & lactandus, & educandus traditur, quo matris gaudio explicari non potest. Jam factus adultior adducitur ad Principem regiam, & ab illa in filium adoptatur.

Ast cum Moses afflictionem populi cerneret, non ferens injuriam Ægyptium quendam, qui Israelitam percusserat, interfecit.



Ne vero cædes innotesceret Regi, defuncti cadaver abscondit in fabulo. Altera die denuo egressus ad suos duos ex Hebræis rixantes invenit. Indignitate rei commotus utrumque ad concordiam conabatur reducere. Sed omnia in contrarium evenere. Siquidem e rixantibus alter Ægyptii cædem Mofi objecit, quo ille perterritus, præsertim cum & Pharaon eandem ob causam ipsum pararet occidere, fuga sibi consuluit.

Deserta igitur Ægypto in terram Madian profugit, ductaque ibi uxore Sephora pascendis gregibus incumbibat. Contigit, ut, cum aliquando Moses ad interiora deserti gregem deduceret, illi Dominus in rubo ardente, sed non consumto apparere dignatus sit. Moses rei insolentiam (ut par erat) admiratus nesciebat, quid ista portenderent. Sed clara jam voce vocatus a Domino facile intellexit se Israelitici populi ducem constitutum esse a Domino. Jubetur igitur cum Aarone fratre ingredi ad Regem Ægypti, eique Domini mandata proponere, ut nempe dimitteret populum sat diu injustissime afflictum. Illo cunctante, & inhabilitatem suam pro viribus ostendente suam Deus assistentiam sat large promittit: iret tantum, & divinis obsequeretur imperiis non prodigiorum copiam non copiosa miracula esse defutura. Et quamvis Pharaon omni virium conatu piis petitis restitutus esset, tamen ultimato fore, ut ipso Duce e fornace hac ægyptiaca populus dimitteretur. Nec mora: Moses cum Aarone ad iter accingitur, intrat Ægyptum, ad Regem ingreditur, explicat mandatum Dei Israel, sed inique repellitur. Ast novis a Deo stimulis auctus, & promissionibus munitus certissimis denuo Regis conspectum subit, Dei mandata repetit, egressum ex Ægypto sollicitat. Pharaon veri Numinis inscius petit, quibus denique signis miraculisque missionem suam esse legitimam posset ostendere. Nec mora (ut mandata divina ferebant) Aaron Virgam coram Pharaone projecit, quæ illico in colubrum versa est. Pharaon rei novitate attonitus Sapientes & Maleficos convocavit, ut de re ista sententiam ferrent. Sed cum & ipsi Virgas suas projicerent, eæque in dracones verterentur, obduratum est cor Pharaonis, ne dimitteret populum. Jam hæc historia duo nobis puncta discutienda relinquit. Primum, quinam fuerint

fuerint hi Magi coram Pharaone patrantes ista prodigia? alterum, an veri fuerint serpentes, in quos versa sunt virgæ Magorum? Incipiamus a primo.

## ARTICULUS II.

### *Quinam fuerint hi Magi?*

**N**on multum utilitatis affert hæc quæstio, utpote quam ne ullis quidem conjecturis possemus assequi, nisi aliqualem nobis facem prætulisset Apostolus (*m*). Is enim ad Timotheum scribens duos adducit alias nobis incognitos Jannem nempe & Mambrem. Enimvero hi artibus suis magicis, fictisque prodigiis tantum potuere, ut prima Mosis miracula eluderentur. Sed cum etiam Sciniphes imitari vellent, nec possent, vel inviti confessi sunt (*n*), altioris hoc opus esse potentiæ, nec eousque se magicas vires extendere. Volunt nonnulli hos fratres fuisse & genuinis per Mosem miraculis convictos veritati manus dedisse (*o*), ac veram Religionem amplexos gloriosos pro illa Martyres occubuisse, manibus namque pedibusque præcis Pharaonis jussu in patibulo fuisse suspensos, eoquod illos ab Israelitis corruptos a se alienos crederet. Non tam pie alii de his fratribus sentiunt (*p*); sunt enim, qui illos ex Balaamo Patre derivant, eundemque comitatos affirmant, quando vel invitus apud Balacum Moabitarum Regem benedixit Israeliticæ genti. Alii autumant ipsos cum Patribus suis totoque Ægyptiorum exercitu in mari rubro fuisse submersos.

Nec tamen credendum est hos duos tantum coram Pharaone fuisse præsentem; ex omnibus enim regni amplissimi finibus ejusmodi homines convocavit. Sed cum duo hi fratres præ omnibus aliis in magica arte præcellerent, hos duos præ cæteris Mofi & Aaroni objecit. Verum cum & isti altiori potentiæ cederent, reliqui,

quos

---

(*m*) 2. Tim. 3. v. 8.

(*n*) Exod. 8. v. 19.

(*o*) apud Calmet. in Dict. Bibl. lit. I.

(*p*) l. c.



quos ad 70000 nonnulli extendunt, victas per sese manus dare coacti sunt.

Verum quid in hisce diutius immoror, cum ne accensa quidem lampade in veritatis notitiam devenire possimus? tanta inter Scriptores caligo est, ut densissimis etiam Ægyptiorum tenebris comparari valeat. Plinius eousque devenit audaciæ (q), ut ipsum etiam Mosem Magorum accenseat numero: *Est & alia magices factio, inquit, a Mose & Jamne & Jotape Judæis pendens.* In tanta rerum confusione nobis sufficiat diabolicam Magorum potentiam tota Pharaonis aula præsentem a Mose & Aarone superatam fuisse.

### ARTICULUS III.

#### *An Magi coram Pharaone veros serpentes produxerint?*

Huic quæstioni prima Dissertationis parte sufficienter prælusum est. Adversarii siquidem, cum Magiam diabolicam nequaquam activam esse contendunt, necessario debent dicere non veros serpentes a Magis hisce productos fuisse. Ego vero, cum artem hanc & ludentem & operantem defenderim, neutiquam ita coarctor, ut necessario mihi dicendum sit veros a Magis serpentes productos fuisse. Etiam si in casu hoc astantium oculis illusum fuisset, minime tamen ex hoc posset inferri, universaliter, quæ ope dæmonis fiunt, meras sensuum decipulas esse debere.

Præsens difficultatis punctum quod attinet, ingenue fateor nonnullos ex Patribus sat aperte tueri serpentes hos magica arte productos nequaquam veros serpentes fuisse; sic enim Author quæstionum orthodoxarum, quem falso nonnulli Justinum existimant (r): *Miracula a Mose præstita, ut quæ divina vi & efficacia essent edita, per transmutationem naturæ ejus in naturam ejus, quod perficiebatur, sunt facta; quæ autem incantatores edidit, dæmonum operatione sunt exhibita oculos spectantium præstigiis decipientium, ut serpens, qui non esset, tanquam serpentem, & qui sanguis non esset, quasi sanguinem, & quæ ranæ non essent, velut ranas cernerent.* In

(q) Lib. 30. c. 1.

(r) Tom. 2. Bibl. PP. ad quæst. 26.

In hanc sententiam concedit & Tertullianus (s): *Nec magnum illi (dæmoni scilicet) exteriores oculos circumscribere, cui interiorum mentis aciem excacare perfacile est. Corpora denique videbantur Pharaoni & Ægyptiis magicarum virgarum dracones, sed Moysi veritas mendacium devoravit.*

Idem defendit & Nyssen Gregorius (t): *Cum ad inaudita signa, miraculaque versus esset Moyses, coramque ipsis Ægyptiis virgam suam in colubrum vertisset, Pharao, id enim nomen erat Tyranno, Magorum ineptiis fretus magis resistebat. Si enim virgas similiter suas in terram projectas in dracones mutasse videbantur, sed qui ex virga Moysi vere animatus erat, Magorum virgas re ligna, visus deceptione dracones facile devoravit. Omitto Hieronymum, Rupertum Abbatem & alios.*

Sed pace mea sentiant alii, quidquid voluerint, mihi Scriptura est potior, quæ eodem prorsus modo de serpentibus Moysi, & Magorum draconibus loquitur, audiamus tantummodo textum sacrum (u): *Ingressi itaque Moyses & Aaron ad Pharaonem fecerunt, sicut præceperat Dominus, tulitque Aaron virgam coram Pharaone & servis ejus, quæ versa est in colubrum. Vocavit autem Pharao Sapientes & Maleficos, & fecerunt etiam ipsi per incantationes ægyptiacas & arcana quædam similiter, projeceruntque singuli virgas suas, quæ versæ sunt in dracones.* Jam quomodo verum esset, quod Magi similiter fecerint, si virga Moysi in verum serpentem conversa est, nequaquam vero virgæ Magorum? quomodo verum est, quod virgæ eorum versæ sint in dracones, si tantum astantium oculis illudebatur? Enimvero, si meræ sensuum deceptiones fuissent, non latuisset id Moysen, nec est ulla ratione credibile, quod Dei famulus dæmonis non detexisset præstigias, ergo dicendum veros fuisse serpentes.

Nec etiam nostræ sententiæ sua deest, autoritas sic enim Origenes (x): *Efficit similiter & contraria virtus virgam serpentem, sicut fecerat virtus Dei, sed serpens, qui per virtutem Dei factus fuerat, absorbit, & devoravit omnes illos serpentes, qui arte magica ex virgis versi fuerant in serpentes. Non enim potuit virtus dæmoniaca malum, quod ex bono fecerat, restituere in bonum, potuit ex virga facere serpentem, virgam vero reddere ex serpente non potuit.* I Au-

(s) Lib. de anima.

(t) in vita Moysi.

(u) Ezod. 7. v. 10. & seq.

(x) Tom. 1. hom. 12. in Num.



66 P. II. Art. III. An Magi coram Pharaone &c.

Augustinus pluribus in locis meæ adhæret sententiæ, textum breviorē adducam (y): *Et Magi Pharaonis similiter serpentes fecerunt, & alia similia.* Dein fufius probat, quod tamen propterea dæmones non poffint dici creatores serpentum.

Etiam Theodoretus ex profeffo hanc tuetur fententiam, cuius textum utpote longiorē adducere nimis operofum eft (z).

Si quæras, quomodo id potuerit contingere, denuo refpondeo me ignorare, nihil enim difficilior capio, quam quomodo fpiritus agat in corpora, imo nifi Scriptura, quin & propria me experientia de veritate convinceret, difficulter præftarem affenfum. Interea certum eft serpentes a dæmone per creationem non fuiſſe productos, creare enim foli Deo eft proprium. Non displiceret illorum opinio, qui volunt dæmonem ablatis fumma celeritate virgis serpentes ſubſtituiſſe, ſed tunc non verificatur textus, quod virgæ Magorum verſæ ſint in dracones. Potius igitur dixerim laxatis arcana vi virgarum poris ſemen ſerpentinum ſumma celeritate fuiſſe allatum, & ſic serpentes generatos fuiſſe. Hæc ſunt, amice Lector, quæ de ſubtili hac materia diſſerere placuit, ſi amplecti volueris ſyſtema meum, gratulabor mihi: ſi rejeceris, quæſo, in contrarium inſtrue, & docilem me habebis diſcipulum.

Vale.

F I N I S.



CON-

---


(y) Tom. 3. lib. 3. de Trinit. c. 7. (z) Quæſt. 18. in Exod.

# CONCLUSIONES

## E

### SACRA SCRIPTURA

#### DE PROMPTÆ.



#### I.

**S**acram Scripturam, quæ quasi epistola est Creatoris ad creaturam suam aperta fatis evincunt Momenta, unde sapientissime S. Augustinus lib. 12. de Civit. c. 10: *Quanto minus credendum est illis litteris, quas plenas fabulosis velut antiquitatibus proferre voluerunt contra auctoritatem notissimorum, divinorumque librorum, quæ totum orbem sibi crediturum esse prædixit, & cui totus orbis, sicut ab ea prædictum est, credidit, quæ vera se narraſſe præterita ex his, quæ futura prænuntiavit, cum tanta veritate complentur, ostendit.*

II. Ut vero Scriptura sit Verbum Dei proprie tale, necessario requiritur Divina inspiratio juxta illud 2. Pet. 1: *Non voluntate humana allata est aliquando Prophetia, sed Spiritu S. inspirante locuti sunt Sancti Dei homines*, unde & Apostolus 1. Timoth. 3: *Omnis Scriptura Divinitus inspirata utilis est.*

III. Hujus vero Scripturæ Sacræ Verba singula: prout ad sensus substantiam faciunt, censemur esse de fide. *In illa vero canonica eminentia (inquit August. lib. 11. contra Faustum c. 5.) sacrarum litterarum, etiamſi unus Propheta, seu Apostolus, aut Evangelista aliquid in suis litteris posuiſſet, ipsa canonis confirmatione declaratur: non licet dubitare, quia verum sit, alioquin nulla erit pagina, qua humanæ imperitiæ regatur infirmitas, si librorum canonicorum saluberrima auctoritas aut contempta penitus aboletur, aut interminata confunditur.*

IV. Hujus Scripturæ libri tam Proto-quam Deutero-Canonici inviolata fide tanquàm Divini recipiendi sunt, quod dudum agnovit Concilium Toletanum II. ita decernens: *Siquis dixerit vel crediderit alias Scripturas esse Canonicas, præter eas, quas Ecclesia Ca-*



*tholica recipit, anathema sit.* Quæ veritas post Concilii Tridentini definitionem omnino est manifesta.

V. Inter varias Sacræ Scripturæ versiones præstantissima erat procul dubio illa, quæ dicitur 70. Interpretum, cujus historia ob unanimem SS. PP. sententiam quoad substantiam vera esse defenditur, quamvis in aliquibus forsan circumstantiis fallat: sane de hac sequens elogium Augustinus concinnavit Tom. 3. lib. 2. de Doct. Christ. c. 15: *Latinis quibuslibet emendandis Græci adhibeantur, in quibus 70. Interpretum, quod ad vetus testamentum attinet, excellit autoritas.*

VI. E latinis autem versionibus excellit Vulgata nostra, quam maximam sane partem S. debemus Hieronymo Doctori in interpretandis Scripturis Maximo, cui S. Augustinus hoc scripsit elogium: *Quamvis non defuerit temporibus nostris Presbyter Hieronymus homo Doctissimus, & omnium trium linguarum peritus, qui non ex Græco, sed ex Hebræo in Latinum eloquium Scripturas convertit.* Lib. 18. de Civit. c. 43.

VII. Hæc vero Scriptura nequaquam tantæ claritatis est, ut sine ulla difficultate intelligi possit a quolibet. Si enim (ait Hieronymus de Davide loquens in Epist. ad Paulinum de instit. Monach.) *tantus Propheta tenebras ignorantie confitetur, qua nos putat parvulos & pæne lactentes inscitie nocte circumdari.*

VIII. Primorum quinque librorum, qui nomine Pentateuchi veniunt, Authorem fuisse Moysen ex inveterata & Hebræorum & Christianorum traditione deducitur, imo ex ipsius Domini Verbis desumimus apud Joannem c. 5. v. 45. & 46. ita loquentis: *Est, qui accusat vos, Moses, in quo speratis, si enim crederetis Moysi, crederetis forsitan & mihi, de me enim ille scripsit.*

IX. Ex celeberrimo illo Jacobi morientis Vaticinio Gen. 49. *Non auferetur sceptrum de Juda & Dux de femore ejus &c.* Contra Judæos invicte ostendimus Messiam jam venisse: ita tamen, ut vaticinium hoc de sola tribu Juda, nequaquam vero etiam de aliis tribubus intelligi posse, dicamus apertis convicti scripturarum oraculis: *Juda te laudabunt Fratres tui &c.*

X. Terrestris Paradisus, e quo Protoparentes nostri post peccatum ejecti sunt, probabilius amplius non existit: quamvis enim non diffitear nonnullos ex antiquis Patribus in sententia fuisse

fuisse opposita, nullus tamen modernis temporibus illos aliter fuisse sensuros dubito.

XI. Annos vero veterum Patriarcharum, qui ad stupendam omnino senectutem pervenere, non fuisse breviores nostris asserimus suffragantibus Sacrarum Scripturarum oraculis; ita ut argumenta omnia ex profana eruditione petita sint modici roboris.

XII. Noe Gen. 9. inebriatus ab omni culpa omni jure vindicatur: *Ab inexperientia proficiscebatur hæc passio* (ait Theodoretus quæst. 56. in Gen.) *non ab intemperantia.* Nam ille primus ex hominibus compresso vitis fructu ignorans non solum quantum esset bibendum, sed etiam quomodo sumendum, nempe quod prius temperari deberet, & sic potari, incidit in ebrietatem.

XIII. Melchisedech, cujus Gen. 14. fit mentio, Chanaanæus erat, & quidem Rex Hierosolymæ: verti me (ait Hieronymus Tom. 3. in Epist. ad Evagrium) ad Hippolytum, Irenæum Eusebium Cæsareensem & Emisenum Apollinarium quoque nostrum & Eustathium, qui primus Anthiochenæ Ecclesiæ Episcopus contra Arium clarissima tuba cecinit & deprehendi horum omnium opiniones diversis argumentationibus ac diverticulis ad unum computum pervenisse, ut dicerent Melchisedech hominem fuisse Chanaanæum Regem urbis Hierosolymæ, quæ primum Salem postea Jebus, ad extremam Jerusalem appellata sit.

XIV. Jacobus Gen. 27. dicendo Isaaco Patri se esse primogenitum ipsius Esau mentitus non est. Jacob autem (inquit Augustinus Tom. 4. lib. contra mendac. c. 10.) quod Matre fecit Authore, ut Patrem fallere videretur, si diligenter & fideliter attendatur non est mendacium, sed mysterium.

XV. Abraham ingrediendo ad Agar ancillam non est arguendus peccati id fatente Augustino, *quod autem attinet rem gestam, nullo modo est inurendum de hac concubina crimen Abrahæ.* Lib. 16. de Civit. c. 25.

XVI. Primus omnium mortalium Abrahamus circumcisis est annuente Justino Martyr. *Abraham, qui primus circumcisionem carnis accepit:* in Dialog. cum Thryph. Tom. 2. Bibl. PP.

XVII. Quod de Mose Exod. 2. refertur, quod interfecerit hominem Ægyptium, licite fecit. *Sicut Stephanus dicit in actibus Apostolorum* (Augustinus ait quæst. 2. in Exod.) *putabat intel-*



ligere fratres suos, quod per eum Deus daret illis salutem, ut per hoc testimonium videatur Moses jam divinitus admonitus, quod Scriptura eo loco tacet, hoc audere potuisse.

XVIII. Prodigia Magorum corum Rege Pharaone patrata, quorum Exod. 7. fit mentio, non erant vera miracula.

XIX. Hebræi in deserto in vitulo aureo non adoraverunt verum Deum Exod. 32. uti testatur Augustinus: *inde & vitulus ille, quem adoravit populus infidelis apostata, quærens Deos Egyptiorum dimittens eum, qui liberavit de servitute Ægyptiorum.* in Psal. 73.

XX. Moyſes Exod. 32. ad Deum loquens *aut dimitte eis hanc noxam, aut si non facis, dele me de libro tuo, quem scripsisti*, librum æternæ prædestinationis intellexit; unde Augustinus lib. 20. de Civit. c. 15. *Ipsa ejus præscientia de illis, quæ falli non potest, liber est vitæ, in quo sunt scripti, id est ante præcogniti.*

XXI. Beatissima Virgo a lege purificationis lata Levit. 12. omnino immunis erat, ut copiosi PP. textus evincunt, nempe Basilius in c. 7. Isaïæ, Origenes hom. 8. in Levit. Chrysostomus hom. de occurſu Domini, Cyrillus lib. 2. de fide ad Reginas, Bernardus serm. de purific.

XXII. Authorem libri Josue ipsum Josue fuisse censemus, de ipso enim Scriptura: *Scripsit quoque omnia verba hæc in volumine legis Domini.* Jos. c. ult. v. 26.

XXIII. Rahab, quæ in L. Josue exploratores Israelitas suscepisse scribitur, vere fuit meretrix. *Misit exploratores* (dicit Augustinus quæst. 2. in Josue) *in Jericho, quoniam Jordane trajecto ipsis proxime civitas occurrebat, illi autem diverterunt ad Rahab mulierem fornicariam.*

XXIV. Statio solis c. 10. L. Josue imperata per Josuen summe fuit miraculosa: *Hæc secundum historiam gesta* (scribit Origenes hom. 11. in Jos.) *miracula divinæ virtutis universis sæculis prædicant, nec interpretatione extrinsecus indigent, in quibus gestorum lumen coruscat.*

XXV. Quod Judic. 11. de filia Jephthe refertur, censemus illam vere a Patre immolatam fuisse, ut qui improſpecte voverat, errorem votorum in filiæ morte sentiret, ut habet Hieronymus lib. 1. contra Jovinianum.

XXVI. Samson licite se cum Philistæis hostibus ruina domus

mus oppressit : *Nec Samson aliter excusatur* ( verba sunt Augustini ) *quod seipsum cum hostibus ruina domus oppresserit, nisi quia spiritus latenter id jusserat, qui per illum miracula faciebat.*

XXVII. Nonnulli ex PP. quamvis de salute Heli satis loquantur ambigue, tamen sperari meliora posse censemus ob maximam illius resignationem in Divinam voluntatem, quam manifestavit dicendo 1. Reg. 3. v. 18. *Dominus est, quod bonum est, in oculis suis faciat.*

XXVIII. Ille spiritus, qui 1. Reg. 16. dicitur exagitasse Saulem, erat diabolus. *Quod etiam malus appellatus est spiritus Domini* ( verba sunt Augustini ) *sic intelligitur, quomodo dictum est, Domini est terra tanquam creatura in ejus potestate posita, sed magis arbitror malignum spiritum, a quo vexabatur Saul, dictum spiritum Domini, quod occulto Domini Judio, Saulem vexabat.* Lib. 2. ad Simplicii. quæst. 1.

XXIX. David etiam si sæpiissime, & quidem innocens fuerit offensus a Saule, nunquam tamen licite potuisset Saulem occidere, nec contrarium probat Augustini Authoritas lib. contra Adimant. c. 17.

XXX. Samuel, qui a Pythonissa ad preces Saulis ab inferis revocatus est, verus erat Samuel, non spectrum diabolicum, ut denuo prætendit Augustinus in L. de cura pro mortuis : *Mitti quoque ad vivos aliquos ex mortuis, sicut e contrario quod Paulus ex vivis in Paradisum raptus est, Divina Scriptura testatur, nam Samuel Propheta defunctus vivo Sauli etiam Regi futura prædixit.*

XXXI. Abisag Sunamitis, cujus L. 3. Reg. c. 1. fit mentio, vera erat Davidis uxor. *Quæ est ista Sunamitis* ( interrogat Hieronymus Epist. 2. ad Nepotian. ) *uxor & virgo tam fervens &c.*

XXXII. Naaman Syrus postulans ab Elisæo Licentiam, ut adorante Rege suo in templo Remmon posset sustentare Regem adorantem, & id ipsum faciens non est reus criminis idololatriæ, quod ex verbis Elisæi desumitur dicentis : *Vade in pace.* 4. Reg. 5.

XXXIII. Somnium Salomonis, quod 2. Paralip. c. 1. refertur, Propheticum fuit ac divinitus immissum, quapropter & Augustinus L. 12. de Gen. ad litteram c. 15 : *Etiam dormiens Salomon sapientiam præposuit omnibus rebus, eamque neglectis cæteris est precatus a Domino.*

XXXIV.



XXXIV. Liber Tobiae canonicus est, & consequenter Divinae Authoritatis, quod antiquissima dudum Concilia & PP. Ecclesiae agnovere, quamvis de illius canonica Authoritate in primitiva Ecclesia a nonnullis dubitatum sit.

XXXV. Male vero Archangelus Raphael accusatur mendacii, dum se de filiis Israel & tribu Nephtali esse dixit, fratrem Gabeli & Azariam Magni Ananiae filium, quae omnia in sano sensu verissima sunt.

XXXVI. Liber Judith non tantum canonicus est, sed etiam historicus, cum antiquissimi PP. de illo tanquam historico differant, ut Clemens Romanus in Epist. 1. ad Corinth. Alexandrinus L. 4. Stromat. Origenes in L. Judith c. 7. & alii.

XXXVII. Designare vero tempus, quando isthaec historia contigerit, res est sublimioris indaginis, & quamvis communior fere teneat Criticorum sententia eam temporibus Regis Manassis evenisse, probabilius tamen ob nimium clara Achioris verba post tempora captivitatis Babylonicae eandem contigisse existimo.

XXXVIII. Injuriam vero inferunt Heroinae huic, qui illam vel temeritatis vel mendacii alicujus arguunt, utpote quae Divinae Providentiae speciale erat instrumentum ad superbiam Holofernis puniendam assumptum.

XXXIX. Liber Esther, ubi mirabilis legitur Divinae lusus Providentiae in rebus humanis, etiam quoad ultima septem capita, est Divinae Authoritatis, quod post Concilii Tridentini definitionem vocare in dubium non praesumerem.

XL. Quisnam vero fuerit Artaxerxes ille Maritus Estheris, certi nihil haberi potest, inter variantes sententias ea mihi arridet praeter ceteris, quae Darium Histaspem illum fuisse existimat.

XLI. Librum Job canonicum esse nemini dubium est? imo praeterea oportet asserere librum hunc non parabolicum sed vere historicum esse.

XLII. Quod Job 29. v. 18. in Vulgata exstat, sicut palma multiplicabo dies, bene dicitur saltem in ordine ad intentionem Jobi, si non in ordine ad proprietates linguae hebraicae.

XLIII. Quamvis Jobus vir fuerit justissimus, & ipseus Dei ore commendatus; tamen ab omni omnino labe etiam veniali excusari vix poterit, imo de illo verbis facile propriis vincitur.

XLIV.

XLIV. Quamvis inter SS. PP. magnum ubique certamen sit, quisnam Psalmorum Author sit, omnes tamen fatentur aliquorum sine dubio Davidem Authorem esse: imo plures asserunt Psalmos omnes esse a Davide compositos. Unde Theodoretus præfat. in Psal. *Vincat plurium sententia, plures enim scriptores Davidis esse asserunt.*

XLV. Nec contrarium evincunt inscriptiones titulorum, utpote non Autoritate Divina, sed mere humana peractæ.

XLVI. Liber Sapientiæ Salomonem habet Authorem & inter scripturas canonicas jure reputatur.

XLVII. Divina pariter Autoritate gaudet Ecclesiastici liber: *Quid enim, ait Scriptura (interrogat Origenes) quid superbit terra & cinis?* quæ exstant Eccl. 10.

XLVIII. Prophetia Danielis est ex toto canonica, unde nec hymnus trium puerorum, nec historia Susannæ, imo & Beli & Draconis e Canone expungi possunt.

XLIX. Nabuchodonosor (ut refertur Dan. 4.) non fuit vere mutatus in bovem sed in phrenesin incidit, vi cujus perturbata phantasia genium moresque bovis assumpsit: ita Hieronymus in c. 4. Daniel. *quando autem dicit sensum sibi redditum, ostendit, non formam amisisse sed mentem.*

L. Ex celeberrimo Danielis vaticinio de 70 hebdomadibus contra Judæos invictè ostenditur, Messiam venisse. Daniel. 9.

LI. Quamvis autem etiam inter Catholicos non satis conveniat, a quo tempore hebdomadæ istæ inchoari debeant, tamen probabilius existimo tum ex Conjecturis tum ex Chronologia ab anno 7tmo Artaxerxis Longimani inchoandas esse.

LII. Libri duo Machabæorum Canonici sunt, & apparentes Antilogiæ folide dissolvi queunt.

## EX NOVO TESTAMENTO.

### LIII.

**A**pparens Antilogia de Progenitoribus Christi inter Matthæum & Lucam e Julio Africano dissolvitur dicendo, Jacobum patrem Josephi naturalem, Heli vero legalem fuisse.

K

LIV.



LIV. Beatissima Virgo emisit votum castitatis, ut deducitur e Luc. 1: *Quomodo fiet istud, quoniam virum non cognosco?*

LV. Et quidem perpetuæ Virginitatis votum omnium prima emisit B. Virgo. *Mihi Virginitas* (ait Hieronymus) *in Maria dedicatur & Christo.* In epist. ad Eustoch.

LVI. Ex eo, quod nonnulli in Scripturis dicantur fratres Domini, legitime deduci non potest, quod S. Joseph fuerit viduus, quando desponsatus est Virgini.

LVII. Non obstante vero perpetuæ Virginitatis voto in Virgine, verum tamen inter illam, & S. Josephum Matrimonium erat.

LVIII. Quando B. Virgo juxta Evangelium Lucæ visitabat Cognatam suam Elisabeth, comitem Josephum non habuit.

LIX. Quamvis Evangelistis testibus Christum natum esse in Bethlehem negare non possumus, non tamen intra Civitatis mœnia, sed in loco non prope distante natum esse censemus.

LX. Nil equidem ex Evangeliiis datur intelligi, quod bos & asinus fuerint ad præsepe Domini, ex Esaia tamen & Habacuc & longæva traditione istud non obscure colligitur.

LXI. Tres Magi, qui Matthæo teste ad Domini præsepe venerunt, nequaquam Magiæ diabolicæ navabant operam.

LXII. Hi ipsi tamen, quamvis in sensu Scripturæ fuerint Reges, non tamen tales erant in sensu vulgari.

LXIII. Baptismus Joannis, cujus Matth. c. 3. fit mentio, per se & ex natura sua non habuit vim remittendi peccata.

LXIV. Baptismus vero Christi, quamvis ante mortem & passionem Domini institutus fuerit, non tamen illo tempore institutus est, quò Christus a Joanne baptizari voluit.

LXV. Mulier illa, quæ in Evangeliiis sæpius peccatrix dicitur, cum Magdalena jure confunditur;

LXVI. A Maria tamen sorore Marthæ distinguenda est.

LXVII. Ille Simeon, cujus memoriam facit Lucas c. 3, qui Jesum infantem in ulnas suscepit, Sacerdos non erat.

LXVIII. Inter pueros ab Herode occisos Matth. 2. non erat proprius Herodis filius.

LXIX. Caput ultimum Marci inter Scripturas canonicas omnino computari debet.

LXX.

LXX. Uti & inter illas numerari debet historia Luc. 22. de sudore Christi sanguineo, & Angelo ipsum confortante.

LXXI. Nec repudiari debet historia mulieris adulteræ Joan. 3.

LXXII. Ex verbis Christi Joan. 21. ad Petrum: *Sic eum volo manere, donec veniam, quid ad te?* male deducitur Joannem nunquam fuisse mortuum.

LXXIII. Cephas, cui Paulus ad Galat. 2. se restitisse dicit in faciem, Petrus erat Princeps Apostolorum.

LXXIV. Apostolus 1. ad Corinth. 15. dicens: *Quid facient, qui baptizantur pro mortuis?* illorum perstringit errorem, qui putabant homines sine baptismo defunctos juvari posse, si viventes pro iis baptizentur.

LXXV. Epistola ad Hebræos Paulo authore conscripta est, unde & ad Scripturas canonicas pertinet.

LXXVI. Uti & epistola S. Jacobi, quam Lutherus prorsus immerito vocat stramineam.

LXXVII. Eadem vero ratione suscipienda est 2da Petri epistola a Petro scripta.

LXXVIII. Numerum Scripturarum Canonicarum augent 2da & 3tia epistolæ S. Joannis.

LXXIX. Quibus accedit & Epistola Judæ.

LXXX. Tantæ Divinæ autoritatis & Liber Apocalypsis ejusdem Apostoli suscipienda est.

LXXXI. Antichristus, cujus in Apocalypsi & apud Apostolum 2da ad Thessal. fit mentio, homo erit singularis;

LXXXII. Unde Sectariorum blasphemia est per Antichristum designari Romanum Pontificem; vero autem Christo  
& Deo Patri fit

O. H. E. G.

